

農商務省  
漢圖書  
第 六 冊  
號 冊  
共 冊

大政官文庫  
漢書門  
一〇一三  
一三五  
一六五  
冊架函號

內閣文庫  
漢書  
一〇一三  
一六五  
冊架函號

內閣文庫	
番號	漢 1013
冊數	16( 7 )
函號	280 69





隋書卷二十二

明治十二年購求

魏川世鳳書  
氏蘭同甫

志第十七

五行上

太尉楊州都督監脩國史上柱國趙國公長孫無忌等奉敕撰

易以八卦定

吉凶則庖犧所以稱聖也書以九疇論休咎則大禹

所以為明也

春秋以災祥驗行事則仲尼所以垂法也天道以星

象示廢興則

古所以徵驗天神則陰陽不測天則欲人遷善均乎影響殊致同

歸漢時有伏


生董仲舒京房劉向之倫能言災異顧盼六經有足

觀者劉向曰君道得則和氣應休徵生君道違則乖氣應咎徵發

夫天有七曜地有五行五事愆違則天地見異況於日月星辰乎

況於水火金木土乎若梁武之降號伽藍齊文宣之盤遊市里陳

則蔣山之鳥呼曰奈何周則陽武之魚乘空而鬪隋則鵲巢黼帳





火炎門闕豈惟天道亦曰人妖則祥眚呈形于何不至亦有脫略政教張羅罇精崇信巫史重增愆罰昔懷王事神而秦兵逾進長弘尚鬼而諸侯不來往者生之靜也欲者心之使也置情攸往引類同歸雀乳於空城之側鶴飛于鼎耳之上短長之制既曰由人黔隧崇山同車共軫必有神道裁成倚伏一則以爲殃豐一則以爲休徵故曰德勝不祥而義厭不惠是以聖王常由德義消伏災咎也

洪範五行傳曰木者東方威儀容貌也古者聖王垂則天子穆穆諸侯皇皇登輿則有鸞和之節降車則有佩玉之度田狩則有三驅之制飲食則有享獻之禮無事不出境此容貌動作之得節所以順木氣也如人君違時令失威儀田獵馳騁不反宮室飲食沉湎不顧禮制縱欲恣睢出入無度多繇役以奪人時增賦稅以奪

人財則木不曲直

齊後主武平五年鄴城東青桐樹有如人狀京房易傳曰王德衰下人將起則有木生爲人狀是時後主怠於國政耽荒酒色威儀不肅馳騁無度大發繇役盛修宮室後二歲而亡木不曲直之效也

七年宮中有樹大數圍夜半無故自拔齊以木德王無故自拔亡國之應也其年齊亡

開皇八年四月幽州人家以白楊木懸竈上積十餘年忽生三條皆長三尺餘甚鮮茂仁壽二年春螿屋人以楊木爲屋梁生三條長二尺京房易傳曰妃后有顛木仆反立斷枯復生獨孤后專恣之應也

仁壽元年十月蘭州楊樹上松生高三尺六節十二枝宋志曰松



不改柯易葉楊者危脆之木此承久之業將集危亡之地也是時帝惑讒言幽廢冢嫡初立晉王爲皇太子天戒若曰皇太子不勝任承久之業將致危亡帝不悟及帝崩太子立是爲煬帝竟以國亡

仁壽四年八月河間柳樹無故枯落旣而花葉復生京房易飛候曰木再榮國有大喪是歲宮車晏駕

洪範五行傳曰金者西方萬物旣成殺氣之始也古之王者興師動衆建立旗鼓以誅殘賊禁暴虐安天下殺伐必應義以順金氣如人君樂侵陵好攻戰貪城邑之賂以輕百姓之命人皆不安外內騷動則金不從革

陳禎明二年五月東冶鐵鑄有物赤色大如斗自天墜鎔所隆隆有聲鐵飛破屋而四散燒人家時後主與隋雖結和好遣兵度江

掩襲城鎮將士勞弊府藏空竭東冶者陳人鑄兵之所鐵飛爲變者金不從革之應天戒若曰陳國小而兵弱當以和好爲固無鑄兵而黷武以害百姓後主不悟又遣僞將陳紀任蠻奴蕭摩訶數寇江北百姓不堪其役及隋師度江而二將降欵卒以滅亡

洪範五行傳曰火者南方陽光爲明也人君向南蓋取象也昔者聖帝明王負宸攝袂南面而聽斷天下攬海內之雄俊積之於朝以續聰明推邪佞之僞臣投之于野以通壅塞以順火氣夫不明之君惑於讒口白黑雜揉代相是非衆邪並進人君疑惑棄法律間骨肉殺太子逐功臣以孽代宗則火失其性

梁天監元年五月有盜入南北掖燒神武門總章觀時帝初卽位而火燒觀闕不祥之甚也旣而太子薨皇孫不得立及帝暮年惑於朱异之口果有侯景之亂宮室多被焚燒天誠所以先見也



普通二年五月琬琰殿火延燒後宮三千餘間中大通元年朱雀  
航華表災明年同泰寺災大同三年朱雀門災水沴火也是時崇  
尚佛道宗廟牲牲皆以麵代之又委萬乘之重數詣同泰寺捨身  
爲奴令王公已下贖之初陽爲不許後爲嘿許方始還宮天誠若  
曰梁武爲國王不遵先王之法而淫於佛道橫多糜費將使其社  
稷不得血食也天數見變而帝不悟後竟以亡及江陵之敗闔城  
爲賤隸焉卽捨身爲奴之應也

陳永定三年重雲殿災

東魏天平二年十一月閹闔門災是時齊神武作宰而大野拔斬  
樊子鵠以州來降神武聽讒而殺之司空元暉免逐功臣大臣之  
罰也

武定五年八月廣宗郡火燒數千家

後齊後主天統三年九龍殿災延燒西廊西年昭陽宣光瑤華三  
殿災延燒龍舟是時讒言任用正士道消祖孝徵作歌謠解律明  
月以誅死讒夫昌邪勝正之應也京房易傳曰君不思道厥妖火  
燒宮

開皇十四年將祠泰山令使者致石像神祠之所未至數里野火  
欵起燒像碎如小塊時帝頗信讒言猜阻骨肉滕王瓚矢志四死  
創業功臣多被夷滅故天見變而帝不悟其後太子勇竟被廢戮  
大業十二年顯陽門災舊名廣陽則帝之姓名也國門之崇顯號  
令之所由出也時帝不遵法度驕奢荒怠裴蘊虞世基之徒阿諛  
順旨掩塞聰明宇文述以讒邪顯進忠諫者咸被誅戮天戒若曰  
信讒害忠則除廣陽也

洪範五行傳曰水者北方之藏氣至陰也宗廟者祭祀之象也故



天子親耕以供粢盛皇后親蠶以供祭服敬之至也發號施令十二月咸得其氣則水氣順如人君簡宗廟不禱祀逆天時則水不潤下

梁天監二年六月大末信安安豐三縣大水春秋考異郵曰陰盛臣逆人悲則水出河決是時江州刺史陳伯之益州刺史劉季連舉兵反叛師旅數與百姓愁怨臣逆人悲之應也

六年八月建康大水濤上御道七尺七年五月建康又大水是時數興師旅以拒魏軍十二年四月建康大水是時大發卒築浮山堰以過淮水勞役連年百姓悲怨之應也

中大通五年五月建康大水御道通船京房易飛候曰大水至國賤人將貴蕭棟侯景僭稱尊號之應也

後齊河清二年十二月兗趙魏三州大水天統三年并州汾水溢

識曰水者純陰之精陰氣洋溢者小人專制是時和士開元文遙

趙彥深專任之應也

武平六年八月山東諸州大水京房易飛候曰小人踊躍無所畏忌陰不制於陽則涌水出是時羣小用事邪佞滿朝闔豎嬖倖伶人封王此其所以應也

開皇十八年河南八州大水是時獨孤皇后干預政事濫殺宮人放黜宰相楊素頗專水陰氣臣妾盛彊之應也

仁壽二年河南河北諸州大水京房易傳曰顓事有智誅罰絕理則厥災水亦由帝用刑嚴急臣下有小過帝或親臨斬決又先是枉國史萬歲以忤旨被戮誅罰絕理之應也

大業三年河南大水漂沒三十餘郡帝嗣位已來未親郊廟之禮簡宗廟廢祭祀之應也



洪範五行傳曰土者中央爲內事宮室臺榭夫婦親屬也古者自天子至於士宮室寢居大小有差高卑異等骨肉有恩故明王賢君修宮室之制謹夫婦之別加親戚之恩敬父兄之禮則中氣和人君肆心縱意大爲宮室高爲臺榭雕文刻鏤以疲人力淫泆無別妻妾過度犯親戚侮父兄中氣亂則稼穡不成

齊後主武平四年山東饑是時大興土木之功於仙都苑又起宮於邯鄲窮侈極麗後宮侍御千餘人皆寶衣玉食逆中氣之咎也煬帝大業五年燕代齊魯諸郡饑先是建立東都制度崇侈又宗室諸王多遠徙邊郡

洪範五行傳曰貌之不恭是謂不肅則下不敬陰氣勝故厥咎狂厥罰常雨厥極惡時則有服妖時則有龜孽有雞禍有下體生上體之病有青眚青祥惟金沴木

### 貌不恭

侯景僭卽尊號升圓丘行不能正履有識者知其不免景尋敗梁元帝旣平侯景破蕭紀而有驕矜之色性又沉猜由是臣下離貳卽位三年以爲西魏所陷帝竟不得其死

陳後主每祀郊廟必稱疾不行建寧令章華上奏諫曰拜三妃以臨軒祀宗廟而稱疾非祇肅之道後主怒而斬之又引江總孔範等內宴無復尊卑之序號爲狎客專以詩酒爲娛不恤國政祕書監傅縡上書諫曰人君者恭事上帝子愛下人省嗜慾遠邪佞未明求衣日旰忘食是以澤被區宇慶流子孫陛下頃來酒色過度不虔郊廟大神專媚淫昏之鬼小人在側宦豎擅權惡誠直如仇讎視時人如草芥後宮曳羅綺廐馬餘菽粟百姓流離轉屍蔽野神怒人怨衆叛親離臣恐東南王氣自斯而盡後主不聽驕恣日



甚未幾而國滅

陳司空侯安都自以有安社稷之功驕矜日甚每侍宴酒酣輒箕踞而坐嘗謂文帝曰何如作臨川王時又借華林園水殿與妻妾賓客置酒於其上帝甚惡之後竟誅死

東魏武定五年後齊文襄帝時為世子屬神武帝崩秘不發喪朝魏帝於鄴魏帝宴之文襄起舞及嗣位又朝魏帝於鄴侍宴而情有識者知文襄之不免後果為盜所害

神武時司徒高昂嘗詣相府將直入門門者止之昂怒引弓射門者神武不之罪尋為西魏所殺

後齊後主為周師所迫至鄴集兵斛律孝卿勸後主親勞將士宜流涕慷慨以感激之人當自奮孝卿授之以辭後主然之及對眾嘿無所言因赧然大笑左右皆哂將士怒曰身尚如此吾輩何急

由是皆無戰心俄為周師所虜

煬帝自負才學每驕天下之士嘗謂侍臣曰天下當謂朕承藉餘緒而有四海耶設令朕與士大夫高選亦當為天子矣謂當世之賢皆所不逮書云謂人莫已若者亡帝自矜已以輕天下能不亡乎帝又言習吳音其後竟終於江都此亦魯襄公終於楚宮之類也

常雨水

梁天監七年七月雨至十月乃霽洪範五行傳曰陰氣彊積然後生水雨水之災時武帝頻年興師是歲又大舉北伐諸軍頗捷而士卒罷弊百姓怨望陰氣畜積之應也

陳太建十二年八月大雨霖霖時始興王叔陵驕恣陰氣盛彊之應也明年宣帝崩後主立叔陵刺後主於喪次官人救之僅而獲免叔陵出閣就東府作亂後主令蕭摩訶破之死者千數



東魏武定五年秋大雨七十餘日元瑾劉思逸謀殺後齊文襄之應也

後齊河清三年六月庚子大雨晝夜不息至甲辰山東大水人多餓死是歲突厥寇并州陰戎作梗此其應也

天統三年十月積陰大雨胡太后淫亂之所感也

武平七年七月大霖雨水滂人戶流亡是時駱提婆韓長鸞等用事小人專政之罰也

後周建德三年七月霖雨三旬時衛刺王直潛謀逆亂屬帝幸雲陽宮以其徒襲肅章門尉遲運逆拒破之其日雨霽

大雨雪

梁普通二年三月大雪平地三尺洪範五行傳曰庶徵之常雨也然尤甚焉雨陰也雪又陰畜積其盛也皆妾不妾臣不臣之應時

義州刺史文僧朗以州叛於魏臣不臣之應也

大同三年七月青州雪害苗稼是時交州刺史李賁舉兵反僭尊號置百官擊之不能克

十年十二月大雪平地三尺是時邵陵王綸湘東王繹武陵王紀並權伴人主頗為驕恣皇太子甚惡之帝不能抑損上天見變帝

又不悟及侯景之亂諸王各擁強兵外有赴援之名內無勤王之實委棄君父自相屠滅國竟以亡

東魏興和二年五月大雪時後齊神武作宰癸卒十餘萬築鄴城百姓怨思之徵也

武定四年二月大雪人畜凍死時路相望時後齊霸政而步落稽舉兵反寇亂數州人多死亡

後齊河清二年二月大雪連雨南北千餘里平地數尺繁霜晝下



是時突厥木杵可汗與周師入并州殺掠吏人不可勝紀

天統二年十一月大雪三年正月又大雪平地二尺武平三年正月又大雪是時馮淑妃陸令萱內制朝政陰氣盛積故天變屢見雷雨不時

陳太建元年七月大雨震萬安陵華表又震慧日寺刹瓦官寺重閣門下一女子震死京房易飛候曰雷雨霹靂丘陵者逆先人令爲火殺人者人君用讒言殺正人時蔡景歷以奸邪任用右僕射陸繕以讒毀獲譴發病而死

十年三月震武庫時帝好兵頻年北伐內外虛竭將士勞弊既克淮南又進圖彭汴毛喜切諫不納由是吳明徹諸軍皆沒遂失淮南之地武庫者兵器之所聚也而震之天戒若曰宜戢兵以安百姓帝不悟又大興軍旅其年六月又震太皇寺刹莊嚴寺露槃重

陽閣東樓鴻臚府門太皇莊嚴二寺陳國奉佛之所重陽閣每所遊宴鴻臚賓客禮儀之所在而同歲震者天戒若曰國威已喪不務修德後必有恃佛道耽宴樂棄禮儀而亡國者陳之君臣竟不悟至後王之代災異屢起懼而於太皇寺捨身爲奴以祈冥助不恤國政耽酒色棄禮法不修隣好以取敗亡

齊武平元年夏震丞相段孝先南門柱京房易傳曰震擊貴臣門及屋者不出三年佞臣被誅後歲和士開被戮

木冰

東魏武定四年冬天雨木冰洪範五行傳曰陰之盛而凝滯也木者少陽貴臣象也將有害則陰氣脅木木先寒故得雨而冰襲之木冰一名介介者兵之象也時司徒侯景制河南及神武不豫文襄懼其爲亂而徵之景因舉兵反豫州刺史高元成襄州刺史李



密廣州刺史暴顯並為景所執辱貴臣有害之應也其後左僕射

慕容紹宗與景戰於渦陽俘斬五萬

後齊天保二年雨水冰三月初清河王岳為高歸彥所譖是歲以

憂死

武平元年冬雨水冰明年二月又雨水時錄尚書事和士開專政

其年七月太保琅邪王儼矯詔殺之領軍大將軍庫狄伏連尚書

右僕射馮子琮並坐儼賜死九月儼亦遇害

六年七年頻歲春冬太冰其年周師入晉陽因平鄴都後主走青

州貴臣死散州郡被兵者不可勝數

大雨雹

梁中大通元年四月大雨雹洪範五行傳曰雹陰脅陽之象也時

帝數捨身為奴拘信佛法為沙門所制

陳大建二年六月大雨雹十年四月又大雨雹十三年九月又雨

雹時始興王叔陵驕恣陰結死士圖為不逞帝又寵遇之故天三

見變帝不悟及帝崩叔陵果為亂逆

服妖

後齊婁后臥疾寢衣無故自舉俄而后崩

文宣帝末年衣錦綺傅粉黛數為胡服微行市里粉黛者婦人之

飾陽為陰事君變為臣之象也及帝崩太子嗣位被廢為濟南王

又齊氏出自陰山胡服者將反初服也錦綵非帝王之法服微服

者布衣之事齊亡之效也

後主好令宮人以白越布折額狀如髻幘又為白蓋此二者喪禍

之服也後主果為周武帝所滅父子同時被害

武平時後主於苑內作貧兒村親衣縵縷之服而行乞其間以為



笑樂多令人服烏衣以相執縛後王果爲周所敗被虜於長安而死妃后窮困至以賣燭爲業

後周大象元年服冕二十有四旒車服旗鼓皆以二十四爲節侍衛之官服五色雜以紅紫令天下車以大木爲輪不施輻朝士不得佩綬婦人墨粧黃眉又造下帳如送終之具令五皇后各居其一實宗廟祭器於前帝親讀版而祭之又將五輅載婦人身率左右步從又倒懸雞及碎瓦於車上觀其作聲以爲笑樂皆服妖也帝暴崩而政由於隋周之法度皆悉改易

開皇中房陵王勇之在東宮及宜陽公王世積家婦人所服領巾製同架幡軍幟婦人爲陰臣象也而服兵幟臣有兵禍之應矣勇竟而遇害世積坐伏誅

雞禍

開皇中有人上書言頻歲已來雞鳴不鼓翅類腋下物而妨之翮不得舉肘腋之臣當爲變矣書奏不省京房易飛候曰雞鳴不鼓翅國有大害其後大臣多被夷滅諸王廢黜太子幽廢大業初天下雞多夜鳴京房易飛候曰雞夜鳴急令又云昏而鳴百姓有事人定鳴多戰夜半鳴流血漫漫及中年已後軍國多務用度不足於是急令暴賦責成守宰百姓不聊生矣各起而爲盜戰爭不息屍骸被野

龜孽

開皇中掖庭宮每夜有人來挑宮人宮司以聞帝曰門衛甚嚴人何從而入當是妖精耳因戒宮人曰若逢但斫之其後有物如人夜來登牀宮人抽刀斫之若中枯骨其物落牀而走宮人逐之因人池而沒明日帝令涸池得一龜徑尺餘其上有刀迹殺之遂絕



龜者水居而靈陰謀之象晉王諂媚宮掖求嗣之應云

青肯青祥

陳禎明二年四月羣鼠無數自蔡洲岸入石頭淮至青塘兩岸數日死隨流出江近青祥也京房易飛候曰鼠無故羣居不穴衆聚者其君死未幾而國亡

金沴木

陳天嘉六年秋七月儀賢堂無故自壓迺金沴木也時帝盛修宮室起顯德等五殿稱爲壯麗百姓失業故木失其性也儀賢堂者禮賢尚齒之謂無故自壓天戒若曰帝好奢侈不能用賢使能何用虛名也帝不悟明年竟崩

禎明元年六月宮內水殿若有刀鋸斫伐之聲其殿因無故而倒七月朱雀航又無故自沉時後主盛修園囿不虔宗廟水殿者遊

宴之所朱雀航者國門之大路而無故自壞天戒若曰宮室毀津路絕後主不悟竟爲隋所滅宮廟爲墟

後齊孝昭帝將誅楊愔乘車向省入東門愔卒無故自折帝甚惡之歲餘而崩

清河二年長廣郡廳事梁忽剝若人狀太守惡而削去之明日復然長廣帝本封也木爲變不祥之兆其年帝崩

武平七年秋穆后將如晉陽向北宮辭胡太后至宮內門所乘七寶車無故陷入於地牛沒四足是歲齊滅后被虜於長安

後周建德六年青城門無故自崩青者東方色春宮之象也時皇太子無威儀禮節青城門無故自崩者皇太子不勝任之應帝不

悟明年太子嗣位果爲無道周室危亡實自此始

大業中齊王暕於東都起第新構寢堂其楹無故而折時上無太



子天下皆以棟次當立公卿屬望棟遂驕恣呼術者令相又爲厭勝之事堂楹無故自折木失其性姦謀之應也天見變以戒之棟不悟後竟得罪於帝

洪範五行傳曰言之不從是謂不乂厥咎僭厥罰常陽厥極憂時則有詩妖時則有毛蟲之孽時則有犬禍故有口舌之病有白眚白祥惟木沴金

言不從

梁武陵王紀僭即帝位建元曰天正永豐侯蕭撫曰王不克矣昔栢玄年號大亨有識者以爲二月了而玄之敗實在仲春今日天正正之爲文一止其能久乎果一年而敗

後齊文宣帝時太子殷當冠詔令邢子才爲制字子才字之曰正道帝曰正一止也吾兒其督乎子才請改帝不許曰天也因顧謂

常山王演曰奪時任汝慎無殺也及帝崩太子嗣位常山果廢之而自立殷尋見害

武成帝時左僕射和士開言於帝曰自古帝王盡爲灰土堯舜桀紂竟亦何異陛下宜及少壯恣意歡樂一日可以當千年無爲自勤約也帝悅其言彌加淫侈士開既導帝以非道身又擅權竟爲御史中丞所殺

武平中陳人寇彭城後主發言憂懼侍中韓長鸞進曰縱失河南猶得爲龜茲國子淮南今沒何足多慮人生幾何時但爲樂不須憂也帝甚悅遂耽荒酒色不以天下爲虞未幾爲周所滅

武平七年後主爲周師所敗走至鄴自稱太上皇傳位於太子恒改元隆化時人離合其字曰降死竟降周而死

周武帝改元爲宣政梁主蕭歸離合其字爲宇文亡日其年六月



帝崩

宣帝在東宮時不修法度武帝數撻之及嗣位摸其痕而大罵曰死晚也年又改元為大象蕭歸又離合其字曰天子冢明年而帝崩

開皇初梁王蕭琮收元為廣運江陵父老相謂曰運之為字軍走也吾君當為軍所走乎其後琮朝京師而被拘留不反其叔父巖掠居人以叛梁國遂廢

文帝名皇太子曰勇晉王曰英秦王曰俊蜀王曰秀開皇初有人上書曰勇者一夫之用又千人之秀為英萬人之秀為俊斯乃布衣之美稱非帝王之嘉名也帝不省時人呼楊姓多為羸者或言於上曰楊英反為羸殃帝聞而不懌遽改之其後勇俊秀皆被廢黜楊帝嗣位終失天下卒為楊氏之殃

煬帝即位號年曰大業識者惡之

曰於字離合為大苦來

宋本作若素雅不作若者

也尋而天下喪亂率土遭荼炭之

酷焉

煬帝常從容謂祕書郎虞世南曰我性不欲人諫若位望通顯而來諫我以求當世之名者彌所不耐至於卑賤之士雖少寬假然卒不置之於地汝其知之時議者以為古先哲王之馭天下也明四目達四聰懸敢諫之鼓立書謗之木以開言者之路由恐忠言之不至由是澤敷四海慶流子孫而帝惡直言讎諫士其能久乎竟逢殺逆

旱

梁天監元年大旱米斗五千人多餓死洪範五行傳曰若持亢陽之節興師動衆勞人過度以起城邑不顧百姓臣下悲怨然而心不能從故陽氣盛而失度陰氣沉而不附陽氣盛旱災應也初帝



起兵襄陽破張沖敗陳伯之及平建康前後連戰百姓勞弊及卽位後復與魏交兵不止之應也

陳太建十二年春不雨至四月先是周師掠淮北始與王叔陵等諸軍敗績淮北之地皆没于周蓋其應也

東魏天平四年并肆汾建晉絳秦陝等諸州大旱人多流散是歲齊神武與西魏戰於沙苑敗績死者數萬

東魏武定二年冬春旱先是西魏師入洛陽神武親帥軍大戰於芒山死者數萬

後齊天保九年夏大旱先是大發卒築長城四百餘里勞役之應也

乾明元年春旱先是發卒數十萬築金鳳聖應崇光三臺窮極侈麗不恤百姓亢陽之應也

河清二年四月并管已西五州旱是歲發卒築軹關突厥二十萬衆毀長城寇恒州

後主天統二年春旱是時大發卒起大明宮

開皇四年已後京師頻旱時遷都龍首建立宮室百姓勞弊亢陽之應也

大業四年燕代緣邊諸郡旱時發卒百餘萬築長城帝親巡塞表百姓失業道殣相望

八年天下旱百姓流亡時發四海兵帝親征高麗六軍凍餒死者十八九

十三年天下大旱時郡縣鄉邑悉遣築城發男女無少長皆就役詩妖

梁天監三年六月八日武帝講於重雲殿沙門誌公忽然起舞歌



樂須臾悲泣因賦五言詩曰樂哉三十餘悲哉五十裏但看八十  
三子地妖災起佞臣作欺妄賊臣滅君子若不信吾語龍時侯賊  
起且至馬中間銜悲不見喜梁自天監至於大同三十餘年江表  
無事至太清二年臺城陷帝享國四十八年所言五十裏也太清  
元年八月十三而侯景自懸瓠來降在丹陽之北子地帝惑朱异  
之言以納景景之作亂始自戊辰之歲至午年帝憂崩十年四月  
八日誌公于大會中又作詩曰元尾狗子始著狂欲死不死鬻人  
傷須臾之間自滅亡患在汝陰死三湘橫尸一旦無人藏侯景小  
字狗子初自懸瓠來降懸瓠則古之汝南也巴陵南有地名三湘  
卽景奔敗之所

天監中茅山隱士陶弘景爲五言詩曰夷甫任散誕平叔坐談空  
不意昭陽殿忽作卑于宮及大同之季公卿唯以談玄爲務

平叔朝賢也侯景作亂遂居昭陽殿

大同中童謠曰青絲白馬壽陽來其後侯景破丹陽乘白馬以青

絲爲羈勒

陳初有童謠曰黃班青驄馬發自壽陽漢來時冬氣未去日春風  
始其後陳主果爲韓擒所敗擒本名擒獸黃班之謂也破建康之  
始復乘青驄馬往反時節皆相應

陳時江南盛歌王獻之桃葉之詞曰桃葉復桃葉度江不用楫但  
度無所苦我自迎接汝晉王伐陳之始置營桃葉山下及韓擒度  
江大將任蠻奴至新林以導北軍之應

陳後主造齊雲觀國人歌之曰齊雲觀寇來無際畔功未畢而爲  
隋師所虜

禎明初後主作新歌詞甚哀怨令後宮美人習而歌之其詞曰玉



樹後庭花花開不復久時人以歌讖此其不久兆也

齊神武始移都於鄴時有童謠云可憐青雀子飛入鄴城裏作窠猶未成舉頭失鄉里寄書與婦母好看新婦子魏孝靜帝者清河王之子也后則神武之女鄴都宮室未備即逢禪代作窠未成之效也孝靜尋崩文宣以后爲太原長公主降於楊愔時婁后尚在故言寄書於婦母新婦子斥后也

武定中有童謠云百尺高竿摧折水底燃燈澄滅高者齊姓也澄文襄名五年神武崩摧折之應七年文襄遇盜所害澄滅之徵也

天保中陸灝和入國書其屋壁曰十年天子爲尚可百日天子急如火周年天子迭代坐時文宣帝享國十年而崩廢帝嗣立百餘日用晉厥位孝昭即位一年而崩此其效也

武平元年童謠曰狐截尾你欲除我我除你其年四月隴東王胡

長仁謀遣刺客殺和士開事露返爲士開所譖死

二年童謠曰和士開七月三十日將你向南臺小兒唱訖一時拍手云殺却至七月二十五日御史中丞琅邪王儼執士開送於南臺而斬之是歲又有童謠曰七月刈禾傷旱九月喫饀正好十月洗蕩飯瓮十一月出却趙老七月士開被誅九月琅邪王遇害十一月趙彥深出爲西兗州刺史

武平末童謠曰黃花勢欲落清樽但滿酌時穆后母子淫僻干預朝政時人患之穆后小字黃花尋逢齊亡欲落之應也

鄴中又有童謠曰金作掃帚玉作把淨掃殿屋迎西家未幾周師入鄴

周初有童謠曰白楊樹頭金雞鳴祇有阿舅無外甥靜帝隋氏之甥既遜位而崩諸舅彊盛



周宣帝與宮人夜中連臂蹋蹄而歌曰自知身命促把燭夜行遊  
帝卽位三年而崩

開皇十年高祖幸并州宴秦孝主及王子相帝爲四言詩曰紅顏  
詎幾玉貌須臾一朝花落白髮難除明年後歲誰有誰無明年而  
子相卒十八年而秦孝王薨

大業十一年煬帝自京師如東都至長樂宮飲酒大醉因賦五言  
詩其卒章曰徒有歸飛心無復因風力令美人再三吟詠帝泣下  
霑襟侍御者莫不欷歔帝因幸江都復作五言詩曰求歸不得去  
真成遭箇春鳥聲爭勸酒梅花笑殺人帝以三月被弒卽遭春之  
應也是年盜賊蜂起道路隔絕帝懼遂無還心帝復夢二豎子歌  
曰住亦死去亦死未若乘船度江水由是築居丹楊將居焉功未  
就而帝被弒

大業中童謠曰桃李子鴻鵠達陽山宛轉花林裏莫浪語誰道許  
其後李密坐楊玄感之逆爲吏所拘在路逃叛潛結羣盜自陽城  
山而來襲破洛口倉後復屯兵苑內莫浪語密也宇文化及自號  
許國尋亦破滅誰道許者蓋驚疑之辭也

毛蟲之孽

梁武帝中大同元年邵陵王綸在南徐州臥內方書有狸鬪於欄  
上墮而獲之太清中遇侯景之亂將兵援臺城至鍾山有蟄熊無  
何至鬻綸所乘馬毛蟲之孽也綸尋爲王僧辨所敗亡至南陽爲  
西魏所殺

中大同中每夜狐鳴闕下數年乃止京房易飛候曰野獸羣鳴邑  
中且空虚俄而國亂丹楊死喪略盡

陳禎明初狐入牀下捕之不獲京房易飛候曰狐入君室室不居



幾而國滅

魏武定三年九月豹入鄴城南門格殺之五年八月豹又上銅爵臺京房易飛候曰野獸入邑及至朝廷若道上官府門有大害君亡是歲東魏師敗於玉壁神武遇疾崩

後齊武平二年有兔出廟社之中京房易飛候曰兔入王室其君亡案廟者祖宗之神室也後五歲周師入鄴後王東奔武平末并肆諸州多狼而食人洪範五行傳曰狼貪暴之獸大體以白色爲王兵之表也又似犬近犬禍也京房易傳曰君將無道害將及人去之深山以全身厥妖狼食人時帝任用小人競爲貪暴殘賊人物食人之應尋爲周軍所滅兵之象也武平中朔州府門外無何有小兒腳跡又擁土爲城雉之狀時人恠而察之乃狐媚所爲漸流至并鄴與武定三年同占是歲南安

王思好起兵於北朔直指并州爲官軍所敗鄭子饒羊法高等復亂山東

犬禍

後齊天保四年鄴中及頓丘並有犬與子女交洪範五行傳曰異類不當交而交諄亂之氣犬交人爲犬禍犬禍者亢陽失衆之應也時帝不恤國政恩澤不流於其國

後主時犬爲開府儀同雌者有夫人郡君之號給兵以奉養食以梁肉藉以茵蓐天奪其心爵加於犬近犬禍也天意若曰卿士皆類犬後主不悟遂以取滅

後周保定三年有犬生子腰已後分爲兩身二尾六足犬猛畜而有爪牙將士之象也時宇文護與侯伏侯龍恩等有謀懷貳犬體後分此其應也



大業元年雁門百姓間犬多去其主羣聚於野形頗變如狼而噉噬行人數年而止五行傳曰犬守禦者也而今去其主臣下不附之象形變如狼狼色白爲主兵之應也其後帝窮兵黷武勞役不息天戒若曰無爲勞役守禦之臣將叛而爲害帝不悟遂起長城之役續有西域遼東之舉天下怨叛及江都之變並宿衛之臣也  
白青白祥

梁大同二年地生白毛長二尺近白祥也孫盛以爲勞人之異先是大發卒築浮山堰功費鉅億功垂就而復潰者數矣百姓厭役吁嗟滿道

齊河清元年九月滄州及長城之下地多生毛或白或黑長四五寸近白祥也時北築長城內興三臺人苦勞役

開皇六年七月京師雨毛如髮尾長者三尺餘短者六七寸京房

易飛候曰天雨毛其國大饑是時關中旱米粟涌貴

後齊天統初岱山封禪壇玉璧自出近白祥也岱山王者易姓告代之所玉璧所用幣而自出將有易姓者用幣之象其後齊亡地入於周及高祖受周禪天下一統焚柴太山告祠之應也

武平三年白水巖下青石璧傍有文曰齊亡走人收之爲上延後主以爲嘉瑞百寮畢賀後周師入國後主果棄鄴而走

開皇十七年石隕於武安滏陽間十餘洪範五行傳曰石自高隕者君將有危殆也後七載帝崩

開皇末高祖於宮中埋二小石於地以誌置牀之所未幾變爲玉劉向曰玉者至貴也賤將爲貴之象及大業末盜皆僭名號

大業十三年西平郡有石文曰天子立千年百寮稱賀有識者尤之曰千年萬歲者身後之意也今稱立千年者禍在非遠明年而



帝被殺

木沴金

梁大同十二年曲阿建陵隧口石麒麟動木沴金也動者遷移之象天戒若曰園陵無主石麟將爲人所徙也後竟國亡後齊河清四年殿上石自起兩兩相擊眭孟以爲石陰類下人象殿上石自起者左右親人離叛之應及周師東伐寵臣尉相願乞扶貴和兄弟韓建業之徒皆叛入周

梁大同十二年正月送辟邪二千建陵左雙角者至陵所右獨角者將引於車上振躍者三車兩轅俱折因換車未至陵二里又躍者三每一振則車側人莫不聳奮去地三四尺車輪陷入土三寸木沴金也劉向曰失衆心令不行言不從以亂金氣也石爲陰臣象也臣將爲變之應梁武暮年不以政事爲意君臣唯講佛經談玄而已朝綱紊亂令不行言不從之咎也其後果致侯景之亂周建德元年濮陽郡有石像郡官令載向府將刮取金在道自躍投地如此者再乃以大繩縛著車壁又絕繩而下時帝旣滅齊又事淮南征伐不息百姓疲弊失衆心之應也



事並南面外不息百救無樂夫眾心之動也  
姓此收此昔再八以大歸歸善車壁又歸歸而不却帝謂燕齊又  
周襄顯示平難畏麻首不歸麻官令蒲向和雜時取金在後自罷  
文而曰歸歸秦獨令不許言不歸之答也其終果姪對景之獨

隋書卷二十三

志第十八

五行下

尉楊州都督監稽國史上在國趙國公長孫無忌等奉敕撰

西川屯鳳崗  
氏開國南甫

洪範五行傳曰視之不明是謂不知厥咎舒厥罰常燠厥極疾時  
則有草妖時則有羽蟲之孽故有羊禍故有目疾有赤眚赤祥惟  
水沴火

常燠

後齊天保八年三月大熱人或暍死劉向五行傳曰視不明用近  
習賢者不進不肖不退百職廢壞廢事不從其過在政教舒緩時  
帝狂躁荒淫無度之應

草妖

高祖時上黨有人宅後每夜有人呼聲求之不得去宅一里所但



見人參一本枝葉峻茂因掘去之其根五尺餘具體人狀呼聲遂絕蓋草妖也視不明之咎時晉王陰有奪宗之計諂事親要以求聲譽譖皇太子高祖惑之人參不當言有物憑之上黨黨與也親要之人乃黨晉主而譖太子高祖不悟聽邪言廢無辜有罪用因此而亂也

羽蟲之孽

梁中大同元年邵陵王綸有南徐州坐廳事有野鳥如戴數百飛屋梁上彈射不中俄頃失所在京房易飛候曰野鳥入君室其邑虛君亡之他方後綸為湘東王所襲竟致奔亡為西魏所殺侯景在梁將受錫命陳備物於庭有野鳥如山鵲赤背集於冊書之上鵠鵠鳴於殿與中大同元年同占景尋敗將亡入海中為羊鵠所殺

陳後主時蔣山有眾鳥鼓翼而鳴曰奈何帝京房易飛候曰鳥鳴門闕如人音邑且亡蔣山吳之望也鳥於上鳴吳空虛之象及陳亡建康為墟又陳未亡時有一足鳥集於殿庭其背畫地成文曰獨足上高臺盛草變為灰獨足者叔寶獨行無眾之應盛草成灰者陳政蕪穢被火德所焚除也叔寶至長安館於都水臺上高臺之義也

後齊孝昭帝即位之後有雉飛上御座占同中大同元年又有鳥止於後園其色赤形似鴨而有九頭其年帝崩

天統三年九月禹春鳥集仙都苑京房易飛候曰非常之鳥來宿於邑中邑有兵周師入鄴之應也

武成胡后生後主初有梟升后帳而鳴梟不孝之鳥不祥之應也後主嗣位胡后淫亂事彰遂幽后於北宮焉



武平七年有鶴巢大極殿又巢并州嘉陽殿雉集晉陽宮御座獲之京房易飛侯曰鳥無故巢居君門及殿屋上邑且虛其年國滅周大象二年二月有禿鶯集洛陽宮太極殿其年帝崩後宮常虛開皇初梁主蕭琮新起後有鴿鳥巢其帳隅未幾琮入朝被留於長安梁國遂廢大業末京師宮室中恒有鴻雁之類無數翔集其間俄而長安不守

十三年十一月烏鵲巢帝帳幄驅不能止帝尋逢弒

羊禍

開皇十二年六月繁昌楊悅見雲中二物如羝羊黃色大如新生犬鬪而墜悅獲其一數旬失所在近羊禍也洪範五行傳曰君不明逆火攻之所致也狀如新生犬者羔類也雲體掩蔽邪佞之象

羊國姓羔羊子也皇太子勇旣升儲貳首王陰毀而被廢黜二羔鬪一羔墜之應也

恭帝義寧二年麟遊太守司馬武獻羊羔生而無尾時議者以爲楊氏子孫無後之象是歲煬帝被殺於江都恭帝遜位

赤眚赤祥

梁天監十五年七月荆州市殺人而身不僵首墮于地動口張目血如竹箭直上丈餘然後如雨細下是歲荆州大旱近赤祥寃氣之應

陳太建十四年三月御座幄上見一物如車輪色正赤尋而帝患無故大叫數聲而崩

至德三年十二月有赤物墮於太極殿前初下時鍾皆鳴又嘗進白飲忽變爲血又有血霑殿階漉漉然至御榻尋而國滅



後齊河清二年太原雨血劉向曰血者陰之精傷害之象僵尸之類也明年周師與突厥入并州大戰城西伏屍百餘里京房易飛候曰天雨血染衣國亡君戮亦後主亡國之應  
四年三月有物墮於殿庭色赤形如數斗器衆星隨者如小鈴四月嬖太后崩

武平中有血點地自咸陽王斛律明月宅而至於太廟大將社稷之臣也後主以讒言殺之天戒若曰殺明月則宗廟隨而覆矣後主不悟國祚竟絕

洪範五行傳曰聽之不聰是謂不謀厥咎急厥罰寒厥極貧時則有鼓妖有魚孽有彘禍有黑眚黑祥惟火沴水

寒

東魏武定四年二月大寒人畜凍死者相望於道京房易飛候曰

誅過深當燠而寒是時後齊神武作相先是爾朱文暢等謀害神武事泄伏誅諸與交通者多有濫死

河清元年歲大寒京房易傳曰有德遭險茲謂逆命厥異寒識曰殺無罪其寒必異是時帝淫於文宣李后因生子后愧恨不舉之帝大怒於后前殺其子太原王紹德后大哭帝俛后而撻殺之投於水中良久乃蘇冤酷之應

梁天監三年三月六年三月並隕霜殺草京房易傳曰興兵妄誅謂亡法厥罰霜是時大發卒拒魏軍於鍾離連兵數歲

大同三年六月朔山隕霜

陳太建十年八月隕霜殺稻菽是時大興師選衆遣將吳明徹與周相拒於呂梁  
鼓妖



梁天監四年十一月天清朗西南有電光有雷聲二易曰鼓之以雷霆近鼓沃洪範五行傳曰雷霆託於雲猶君之託於人也君不恤於天下故兆人有怨叛之心也是歲交州刺史李凱舉兵反十九年九月西北隱隱有聲如雷赤氣下至地是歲盜殺東莞琅邪二郡守以胸山引魏軍

中大通六年十二月西南有聲如雷其年北梁州刺史蘭欽舉兵反

陳太建二年十二月西北有聲如雷其年湘州刺史華皎舉兵反

齊天保四年四月西南有聲如雷是時帝不恤天下興師旅

後周建德六年正月西方有聲如雷未幾吐谷渾寇邊

開皇十四年正月且廓州連雲山有聲如雷是時五羌反叛侵擾邊鎮

二十年無雲而雷京房易飛候曰國將易君下人不靜小人先命

國凶有甲兵後數歲帝崩漢王諒舉兵反徙其黨數十萬家

大業中滏陽石鼓頻歲鳴其後天下大亂兵戎並起

魚孽

梁大同十年三月帝幸朱方至四壑中及玄武湖魚皆驤首見於上若望乘輿者帝入宮而沒洪範五行傳曰魚陰類也下人象又有鱗甲兵之應也下人將舉兵圍宮而睥睨乘輿之象也後果有侯景之亂

齊神武武平七年相州鷓鴣泊魚盡飛去而水涸洪範五行傳曰急之所致魚陰類下人象也晏子曰河伯以水爲國以魚爲百姓水涸魚飛國亡人散之象明年而國亡

後周大象元年六月陽武有鯉魚乘空而鬪猶臣下興起小人從



之而鬪也明年帝崩國失政尉迥起兵相州高祖遣兵擊敗之  
開皇十七年大興城西南四里有表村設佛會有老翁皓首白襪  
襦衣來食而去眾莫識追而觀之行二里許不復見但有一波中  
有白魚長丈餘小魚從者無數人爭射之或弓折弦斷後竟中之  
剖其腹得杭飯始知此魚向老翁也後數日漕渠瀑溢射人皆溺  
死

大業十二年淮陽郡驅人入子城鑿斷羅郎郭至女垣之下有穴  
其中得鯉魚長七尺餘昔魏嘉平四年魚集武庫屋上王肅以爲  
魚生於水而亢於屋水之物失其所也邊將殆棄甲之變後果有  
東關之敗是時長白山賊寇掠河南月餘賊至城下郡兵拒之反  
爲所敗男女死者萬餘人

蟲妖

梁大同初大蝗籬門松柏葉皆盡洪範五行傳曰介蟲之孽也與  
魚同占京房易飛候曰食祿不益聖化天視以蟲蟲無益於人而  
食萬物也是時公卿皆以虛澹爲美不親職事無益食物之應也  
後齊天保八年河北六州河南十二州蝗畿人皆祭之帝問魏尹  
丞崔叔瓚曰何故蟲叔瓚對曰五行志云土功不時則蝗蟲爲災今  
外築長城內修三臺故致災也帝大怒毆其頰擢其髮溷中物塗  
其頭役者不止九年山東又蝗十年幽州大蝗洪範五行傳曰刑  
罰暴虐貪饕不厭興師動衆取城修邑而失衆心則蟲爲災是時  
帝用刑暴虐勞役不止之應也

後周建德二年關中大蝗

開皇十六年并州蝗時秦孝王俊哀刻百姓盛修邸第後竟獲譴  
而死



彘禍

開皇末渭南有沙門北漢本三人行投施作頭陀法於人場圃之上夜見大豕來詣其所小豕從者十餘謂沙門曰阿練我欲得賢聖道然猶負他一命言罷而去賢聖道者君上之所行也皇太子勇當嗣業行君上之道而被囚廢之象也一命者言為煬帝所殺

黑眚黑祥

梁承聖三年六月有黑氣如龍見於殿內近黑祥也黑周所尚之

之色今見於殿內周師入梁之象其年為周所滅帝亦遇害

陳太建五年六月西北有黑雲屬地散如猪者十餘洪範五行

曰當有兵起西北時後周將王軌軍於呂梁明年擒吳明徹軍皆

覆沒

火沴水

後齊河清元年四月河濟清襄楷曰河諸侯之象應濁反清諸侯將為天子之象是後十餘歲隋有天下

大業三年武陽縣河清數里鏡澈十二年龍門又河清後二歲大

唐受禪

陳太建十四年七月江水赤如血自建康西至荊州禎明中江水赤自方州東至海洪範五行傳曰火沴水也法嚴刑酷傷水性也五行變節陰陽相干氣色繆亂皆敗亂之象也京房易占曰水化



爲血兵且起是時後主初卽位用刑酷暴之應其後爲隋師所滅  
禎明二年四月郢州南浦水黑如墨黑水在關中而今淮南水黑  
荆揚州之地陷於關中之應也

後周大象元年六月咸陽池水變爲血與陳太建十四年同占是  
時刑罰嚴急未幾國亡

洪範五行傳曰思心不容是謂不聖厥咎瞽厥罰常風厥極凶短  
折有脂夜之妖有華孽有牛禍有心腹之疴有黃眚黃祥木金水  
火沴土

常風

梁天監六年八月戊戌大風折木京房易飛候曰角曰疾風天下  
昏不出三月中兵必起是歲魏軍入鍾離

承聖三年十一月癸未帝閱武於南城北風大急普天昏闇洪範

五行傳曰人君瞽亂之應時帝旣平侯景公卿咸勸帝反丹楊帝  
不從又多猜忌有瞽亂之行故天變應之以風是歲爲西魏滅  
陳天嘉六年七月癸未大風起西南吹倒靈臺候樓洪範五行傳  
以爲大臣專恣之咎太子冲幼安成王頊專政帝不時抑損明年  
崩皇太子嗣位頊遂廢之

太建十二年六月壬戌大風吹壞臯門中闔十二年九月夜又風  
發屋拔樹始興王叔陵專恣之應

至德中大風吹倒朱雀門

禎明三年六月丁巳大風自西北激濤水入石頭淮是時後主任  
司馬申誅戮忠諫沈客卿施文慶專行邪僻江總孔範等崇長淫  
縱杜塞聰明瞽亂之咎

後齊河清二年大風三旬乃止時帝初委政佞臣和士開專恣日



甚

天統三年五月大風晝晦發屋拔樹天變再見而帝不悟明年帝崩後主詔内外表奏皆先詣士開然後聞徹趙郡王徽馮羽王潤按士開驕恣不宜仍居内職反為士開所譖徽竟坐死士開出入宮掖生殺在口尋為琅邪王儼所誅

七年三月大風起西北發屋拔樹五日乃止時高阿那瓌駱提婆等專恣之應

開皇二十年十一月京都大風發屋拔樹秦隴壓死者千餘人地大震鼓皆應淨刹寺鐘三鳴佛殿門鎖自開銅像自出戶外鍾鼓自鳴者近鼓妖也楊雄以為人君不聰為眾所惑空名得進則鼓妖見時獨孤皇后干預政事左僕射楊素權傾人主帝聽二人之讒而黜僕射高熲廢太子勇為庶人晉王鈞虛名而元立思心督

亂陰氣盛之象也鎖心銅像並金也金動木震之水沴金之應洪範五行傳曰失眾心其之所致也高熲楊勇無罪而咸廢黜失眾心也

仁壽二年西河有胡人乘騾在道忽為迴風所飄并一車上千餘尺乃墜皆碎焉京房易傳曰眾逆同志至德乃潛厥異風後二載漢王諒在并州潛謀逆亂車及騾騎之象也升空而墜顛隕之應也天戒若曰無妄動車騎終當覆敗而諒不悟及高祖崩諒發兵反州縣響應眾至數十萬月餘而敗

夜妖

梁承聖二年十月丁卯大風晝晦天地昏暗近夜妖也京房易飛候曰羽日風天下昏火疾不然多寇盜三年為西魏所滅陳禎明三年正月朔旦雲霧晦冥入鼻辛酸後主昏昧近夜妖也



洪範五行傳曰王失中臣下彊盛以蔽君明則雲陰是時北軍臨江柳莊任蠻奴並進中款後主惑佞臣孔範之言而昏暗不能用以致覆敗

東魏武定四年冬大霧六日晝夜不解洪範五行傳曰晝而晦冥若夜者陰侵陽臣將侵君之象也明年元瑾劉思逸謀殺大將軍之應也

周大象二年尉迴敗於相州坑其黨與數萬人於遊豫園其處每聞鬼夜哭聲洪範五行傳曰哭者死亡之表近夜妖也鬼而夜哭者將有死亡之應京房易飛候曰鬼夜哭國將亡明年周氏王公皆見殺周室亦亡

仁壽中仁壽宮及長城之下數聞鬼哭尋而獻后及帝相次而崩於仁壽宮

大業八年楊玄感作亂於東都尚書樊子蓋坑其黨與於長夏門外前後數萬洎于末年數聞其處鬼哭有呻吟之聲與前同占其後王世克害越王侗於洛陽華孽

後齊武平元年槐華而不結實槐三公之位也華而不實萎落之象至明年錄尚書事和士開伏誅隴東王胡長仁太保琅邪王儼皆遇害左丞相段韶薨

陳後主時有張貴妃孔貴嬪並有國色稱為妖艷後主惑之寵冠宮掖每充侍從詩酒為娛一人後庭數旬不出荒淫侈靡莫知紀極府庫空竭頭會箕斂天下怨叛將士離心敵人鼓行而進莫有死戰之士女德之咎也及敗亡之際後主與孔姬俱投於井隋師執張貴妃而戮之以謝江東洪範五行傳曰華者猶榮華容色之



象也以色亂國故謂華孽

齊後主有寵姬馮小憐慧而有色能彈琵琶尤工歌舞後主惑之拜為淑妃選綵女數千為之羽從一女之飾動費千金帝從禽於三堆而周師大至邊吏告急相望於道帝欲班師小憐意不已更請合圍帝從之猶是遲留而晉州遂陷後與周師相遇於晉州之下坐小憐而失機者數矣因而國滅齊之士庶至今咎之

牛禍

梁武陵王紀祭城隍神將烹牛忽有赤蛇繞牛口牛禍也象類言之又為龍蛇之孽魯宣公三年郊牛之口傷時以為天下不享棄宣公也五行傳曰逆君道傷故有龍蛇之是時紀雖以赴援為名而實妄自尊亢思心之咎神不享君道傷之應果為元帝所敗後齊武平二年并州獻五足牛牛禍也洪範五行傳曰牛事應官

室之象也帝尋火發卒於仙都苑穿池築山樓殿間起窮華極麗功始就而國亡

後周建德六年陽武有獸三狀如水牛一黃一赤一黑赤者與黑者鬪久之黃者自傍觸之黑者死黃赤俱入於河近牛禍也黑者周之所尚色死者滅亡之象後數載周果滅而隋有天下旗旌尚赤戎服以黃

大業初恒山有牛四脚膝上各生一蹄其後建東都築長城開溝

心腹之病

陳禎明三年隋師臨江後主從容而言曰齊兵三來周師再來無弗摧敗彼何為者都官尚書孔範曰長江天堑古以為限隔南北今日北軍豈能飛度耶臣每患官卑彼若度來臣為太尉矣後主



大悅因奏妓縱酒賦詩不輟心腹之病也存亡之機定之俄頃君臣肝食不暇後主已不知懼孔範從而蕩之天奪其心曷能不敗陳國遂亡範亦遠徙

齊文宣帝嘗宴於東山投杯赫怒下詔西伐及陳甲兵之盛既而泣謂羣臣曰黑衣非我所制卒不行有識者以帝精魂已亂知帝祚之不永帝後竟得心疾耽荒酒色性忽狂暴數年而崩

武成帝丁太后憂緋袍如故未幾登三臺置酒作樂侍者進白袍帝大怒投之臺下未幾而崩

黃省黃祥

梁大同元年天雨土二年天雨灰其色黃近黃祥也京房易飛候曰聞善不及茲謂有知厥異黃厥咎龍厥災不嗣蔽賢絕道之咎也時帝自以為聰明博達惡人勝已又篤信佛法捨身為奴絕道

蔽賢之罰也

大寶元年正月天雨黃沙二年簡文帝夢瓦土而吞之尋為侯景所廢以土囊壓之而斃諸子遇害不嗣之應也

陳後主時夢黃衣人圍城後主惡之遠城橋樹盡伐去之隋高祖受禪之後上下通服黃衣未幾隋師攻圍之應也

後周大象二年正月天雨黃土移時乃息與大同元年同占時帝昏狂滋甚期年而崩至於靜帝用遜厥位絕道不嗣之應也

開皇二年京師雨土是時帝懲周室諸侯微弱以亡天下故分封諸子並為行臺專制方面失土之故有土氣之祥其後諸王各謀為逆亂京房易飛候曰天雨土百姓勞苦而無功其時營都邑後起仁壽宮頽山堙谷丁匠死者大半

裸蟲之孽



梁大清元年丹楊有莫氏妻生男眼在頂上大如兩歲兒墜地而言曰兒是旱疫鬼不得在母曰汝當令我得過疫鬼曰有上官何得自由母可急作絳帽故當無憂母不服作帽以絳繫髮自是旱疫者二年楊徐兗豫尤甚莫氏鄉隣多以絳免他土效之無驗  
大寶二年京口人於藏元年五歲登城西南角大樓打鼓作長江欄鼓兵象也是時候景亂江南

陳永定三年有人長三文見羅浮山通身潔白衣服楚麗京房占曰長人見亡後二歲帝崩

後主爲太子時有婦人突入東宮而大言曰畢國王後主立而祚終之應也

至德三年八月建康人家婢死埋之九日而更生有牧牛人聞而出之

禎明二年有船下忽聞人言曰明年亂視之得死嬰兒長二尺而無頭明年陳滅

齊天保中臨漳有婦人產子二頭共體是後政由姦佞上下無別兩頭之應也

後主時有桑門貌若狂人見烏則向之作禮見沙門則毆辱之烏周色也未幾齊爲周所吞滅除佛

後周保定三年有人產子男陰在背上如尾兩足指如獸爪陰不當生於背而生於背者陰陽反覆君臣顛倒之象人足不當有爪而有爪者將致攫人之變也是時晉蕩公宇文護專擅朝政征伐自己已陰懷篡逆天戒若曰君臣之分已眞矣將行攫噬之禍帝見變而悟遂誅晉公親萬機躬節儉克平齊國號爲高祖轉禍爲福之效也



武帝時有強練者伴狂持一瓠至晉蕩公護門而擊破之曰身尚  
可子苦矣時護專政因朝太后帝擊殺之發兵捕其諸子皆備楚  
毒而死強練又行乞於市人或遺之粟麥輒以無底帛受之因大  
笑曰盛空未幾周滅高祖移都長安城爲墟矣

開皇六年霍州有老翁化爲猛獸

七年相州有桑門變爲蛇尾繞樹而自抽長二丈許

仁壽四年有人長數丈見於應門其迹長四尺五寸其年帝崩

大業元年雁門人房回安母年百歲額上生角長二寸洪範五行

傳曰婦人陰象也角兵象也下反上之應是後天下果大亂陰戎

圍帝於雁門

四年雁門宋谷村有婦人生一肉卵大如斗埋之後數日所埋處

雲霧盡合從地雷震而上視之洞穴失卵所在

六年趙郡李來王家婢產一物大如卵

六年正月朔旦有盜白衣練裙襦手持香花自稱彌勒佛出世入

建國門奪衛士仗將爲亂齊王暕遇而斬之後三年楊玄感作亂

引兵圍洛陽戰敗伏誅

八年有澄公者若狂人於東都大叫唱賊帝聞而惡之明年玄感

舉兵圍洛陽

十二年澄公又叫賊李密逼東都孟讓燒豐都市而去

九年帝在高陽唐縣人朱子賢善爲幻術每夜樓上有光明能變

作佛形自稱彌勒出世又懸大鏡於堂上紙素上畫爲蛇爲獸及

人形有人來禮謁者轉側其鏡遣觀來生形像或映見紙上蛇形

子賢輒告云此罪業也當更禮念又令禮謁乃轉人形示之遠近

惑信日數百千人遂潛謀作亂將爲無遮佛會因舉兵欲襲擊乘



輿事世鷹揚郎將以兵捕之夜至其所逮其所居但見火坑兵不敢進郎將曰此地素無坑止妖妄耳及進無復火矣遂擒斬之并坐其黨與千餘家其後復有桑門向海明於扶風自稱彌勒佛出世潛謀逆亂人有歸心者輒獲吉夢由是人皆惑之三輔之士翕然稱爲大聖因舉兵反衆至數萬官軍擊破之京房易飛侯曰妖言動衆者茲謂不信路無人行不出三年起兵自是天下大亂路無人行

木金水火冷土

梁天監五年十一月京師地震木金水火冷土也洪範五行傳曰臣下盛將動而爲害京房易飛侯曰地動以冬十一月者其邑饑亡時交州刺史李軌舉兵反明年霜歲儉人饑普通三年正月建寧地震是時義州刺史支僧朗以州叛

六年十二月地震京房易飛侯曰地冬動有音以十二月者其邑有行兵是時帝令豫章王琮將兵北伐

中大通五年正月建康地震京房易飛侯曰地以春動歲不昌是歲大水百姓饑饉

大同三年十一月建康地震京房易飛侯曰地震以十一月邑有大喪及饑亡明年霜爲災百姓饑

三年十月建康地震是歲會稽山賊起

七年二月建康地震是歲交州人李賁舉兵逐刺史蕭諮

九年閏正月地震李賁自稱皇帝署置百官  
太清三年四月建康地再震時侯景自爲大丞相錄尚書事帝所須不給是月以憂憤崩

陳永定二年五月建康地震時王琳立蕭莊於鄴州



太建四年十一月地震陳寶應反閩中

禎明元年正月地震施文慶沈客卿專恣之應也

東魏武定二年十一月西河地陷而且然京房易妖占曰地自陷

其君亡祖暉曰火陽精也地者陰主也地然越陰之道行陽之政

臣下擅恣終以自害時後齊神武作宰而侯景專擅河南後二歲

神武果崩景遂作亂而自取敗亡之應

後齊河清二年并州地震和士開專恣之應

後周建德二年涼州地頻震城郭多壞地裂出泉京房易妖占曰

地分裂羌夷叛時吐谷渾頡寇河西

開皇十四年五月京師地震京房易飛候曰地動以夏五月人流

亡是歲關中饑帝令百姓就糧於關東

仁壽二年四月岐雍地震京房易飛候曰地動以夏四月五穀不

### 熟人大饑

三年梁州就谷山崩洪範五行傳曰崩散落背叛不事上之類也

梁州爲漢地明年漢王諒舉兵反

大業七年砥柱山崩壅河逆流數十里劉向洪範五行傳曰山者

君之象水者陰之表人之類也天戒若曰君人擁威重將崩壞百

姓不得其所時帝興遼東之師百姓不堪其役四海怨叛帝不能

悟卒以滅亡

洪範五行傳曰皇之不極是謂不建厥咎替厥罰常陰厥極崩時

則有射妖則有龍蛇之孽則有馬禍

雲陰

開皇二十年十月以陰不雨劉向曰王者失中臣下彊盛而蔽君

明則雲陰是時獨孤后遂與楊素陰譖太子勇廢爲庶人



射妖

東魏武定四年後齊神武作宰親率諸軍攻西魏於玉壁其年十一月帝不豫班師將士震懼皆曰韋孝寬以定功弩射殺丞相西魏下令國中曰勁弩一發凶身自殞神武聞而惡之其疾暴增近射妖也洪範五行傳曰射者兵戎禍亂之象氣逆天則禍亂將起神武行殿中將軍曹魏諫曰王以死氣逆生氣爲客不利主人則可帝不從頓軍五旬頓戰沮衄又聽狐虛之言於城北斷汾水起土山其處天險千餘尺功竟不就死者七萬氣逆天之咎也其年帝崩明年王思政擾河南

武平後主自并州還鄴至八公嶺夜與左右歌而行有一人忽發狂意後主以爲狐媚伏草中彎弓而射之傷數人幾中後主後主執而斬之其不自覺也狐而能媚獸之妖妄也時帝不恤國政專與內人鬪豎酣歌爲樂或衣縵縷衣行乞爲娛此妖妄之象又射之兵戎禍亂之應也未幾而國滅

龍蛇之孽

梁天監二年北梁州潭中有龍鬪潰霧數里龍蛇之孽洪範五行傳曰龍獸之難害者也天之類君之象天氣害君道傷則龍亦害鬪者兵革之象也京房易飛候曰衆心不安厥妖龍鬪是時帝初卽位而有陳伯之劉季連之亂國內危懼

普通五年六月龍鬪于曲阿王陂因西行至建陵城所經之處樹木皆折開數十丈與天監二年同占經建陵而樹木折者國有兵革之禍園陵殘毀之象時帝專以講論爲務不從耕戰將輕而卒倚君道旣傷故有龍孽之應帝殊不悟至太清元年黎州水中又有龍鬪波浪涌起雲霧四合而見白龍南走黑龍隨之其年侯景



以兵來降帝納之而無備國人皆懼俄而難作帝以憂崩

大同十年夏有龍夜因雷而墮延陵人家井中明旦視之大如驢將以戟刺之俄見庭中及室中各有大蛇如數百斛船家人奔走洪範五行傳曰龍陽類貴象也上則在天下則在地不當見庶人邑里室家井中幽深之象也諸侯且有幽執之禍皇不建之咎也後侯景反果幽殺簡文于酒庫宗室王侯皆幽死

陳太建十一年正月龍見南兗州池中與梁大同十年同占未幾後主嗣位驕淫荒怠動不得中其後竟以國亡身被幽執

東魏武安元年有大蛇見武牢城是時北豫州刺史高仲密妻李氏慧而艷世子澄悅之仲密內不自安遂以武牢叛陰引西魏大戰於河陽神武為西兵所窘僅而獲免死者數千

後齊天保九年有龍長七八丈見齊州大堂占同大同十年時常

山長廣二王權重帝不思抑損明年帝崩太子殷嗣立常山王演果廢帝為濟南王幽而害之

河清元年龍見濟州滌堂中占同天保九年先是平秦王歸彥受昭帝遺詔立太子百年為嗣而歸彥遂立長廣王湛是為武成帝而廢百年為樂陵王竟以幽死

天統四年貴鄉人伐枯木得一黃龍折脚死於孔中齊稱木德龍君象木枯龍死不祥之甚其年武成崩

武平三年龍見邯鄲井中其氣五色屬天又見汲郡佛寺澗井中占同河清元年後主竟降周後被誅

武平七年并州招遠樓下有赤蛇與黑蛇鬪數日赤蛇死赤齊尚色黑周尚色鬪而死滅亡之象也後主任用邪佞與周師連兵於晉州之下委軍於孽臣高阿那肱竟啟敵人皇不建之咎也後主



遂為周師所虜

琅邪王儼壞北宮中白馬浮圖石趙時澄公所建見白蛇長數丈迴旋失所在時儼專誅失中之咎也見變不知戒以及於難

後周建德五年黑龍墜於亳州而死龍君之象黑周所尚色墜而死不祥之甚時皇太子不才帝每以為慮直臣王軌宇文孝伯等驟請廢立帝不能用後二歲帝崩太子立虐殺齊王及孝伯等因而國亡

仁壽四年龍見代州總管府井中其龍或變為鐵馬甲士變弓上射之象變為鐵馬近馬禍也彎弓上射又近射妖諸侯將有兵革之變以致幽囚也是時漢王諒潛謀逆亂故變兵革之諒不悟遂與兵反事敗廢為庶人幽囚數年而死

馬禍

侯景僭尊號於江南每將戰其所乘白馬長鳴噪足者輒勝垂頭者輒不利西州之役馬臥不起景拜請且筆之竟不動近馬禍也洪範五行傳曰馬者兵象將有寇戎之事故馬為惟景因此大敗陳太建五年衡州馬生角洪範五行傳曰馬生角兵之象敗亡之表也是時宣帝遣吳明徹出師呂梁與周師拒連兵數歲衆軍覆沒明徹竟為周師所虜

天保中廣宗有馬兩耳間生角如羊尾京房易傳曰天子親伐則馬生角四年契丹犯塞文宣帝親御六軍以擊之

大業四年太原廐馬死者大半帝怒遣使案問主者曰每夜廐中馬無故自驚因而致死帝令巫者視之巫者知帝將有遼東之役因希旨言曰先帝令楊素史萬歲取之將鬼兵以伐遼東也帝大悅因釋主者洪範五行傳曰逆天氣故馬多死是時帝每歲巡幸



北事長城西通且末國內虛耗夫戒若曰除厩無事巡幸帝不  
悟遂至亂

十一年河南扶風三郡並有馬生角長數寸與天保初同占是時  
帝頻歲親征高麗

義寧元年帝在江都宮龍廐馬無故而死旬日死至數百匹與大  
業四年同占

隋書卷二十三 五行志第十八終

西川中興  
氏閣

隋書卷二十四

西川中興  
氏閣

志第十九

太尉楊州都督監脩國史上柱國趙國公臣長孫無忌等奉敕撰

食貨

王者量地以制邑度地以居人總土地所生料山澤之利式遵行  
令敬授人時農商趣向各本事業書稱懋遷有無言穀貨流通咸  
得其所者也周官太府掌九貢九賦之法王之經用各有等差所  
謂取之以道用之有節故能養百官之政勗戰士之功救天災服  
方外活國安人之大經也爰自軒頊至于堯舜皆因其所利而勸  
之因其所欲而化之不奪其時不窮其力輕其征薄其賦此五帝  
三皇不易之教也古語曰善為人者愛其力而成其財若使之不  
以道斂之如不及財盡則怨力盡則叛昔禹制九等而康歌興周  
人十一而頌聲作於是東周遷洛諸侯不軌魯宣初稅畝鄭產為



丘賦先王之制靡有子遺秦氏起自西戎力正天下驅之以刑罰  
棄之以仁恩以太半之收長城絕於地脉以頭會之斂屯戍窮於  
嶺外漢高祖承秦凋弊十五稅一中元繼武府廩彌殷世宗得之  
用成雄侈開邊擊胡蕭然咸罄宮宇捫於天漢巡遊跨於海表旱  
歲除道凶年嘗秣戶口以之減半盜賊以之公行於是譎詭賦稅  
異端俱起賦及童齔筭至船車光武中興聿遵前事成賦單薄足  
稱經遠靈帝開鴻都之榜通賣官之路公卿州郡各有等差漢之  
常科土貢方物帝又遣先輸中署名爲導行天下賄成人受其弊  
自魏晉二十一帝宋齊十有五主雖用度有衆寡租賦有重輕大  
抵不能傾人產業道關政亂隋文帝旣平江表天下大同躬先儉  
約以事府帑開皇十七年戶口滋盛中外倉庫無不盈積所有資  
給不踰經費京師帑屋旣充積於廊廡之下高祖遂停此年正賦

以賜黎元煬皇嗣守鴻基國家殷富雅愛宏翫肆情方騁初造東  
都窮諸巨麗帝昔居藩翰親平江左謙以梁陳曲折以就規摹曾  
雉踰芒浮橋跨洛金門象闕咸竦飛觀頽巖塞川構成雲綺移嶺  
樹以爲林藪包芒山以爲苑囿長城御河不計於人力運驢武馬  
指期於百姓天下死於役而家傷於財旣而一討渾庭三駕遼澤  
天子親伐師兵大舉飛糧輓秣水陸交至疆場之所傾敗勞弊之  
所殞殞雖復太半不歸而每年興發比屋良家之子多赴於邊陲  
分離哭泣之聲連響於州縣老弱耕稼不足以救饑餓婦工紡績  
不足以贍資裝九區之內鸞和歲動從行宮掖常十萬人所有供  
須皆仰州縣租賦之外一切徵斂趣以周備不顧元元吏因割剝  
盜其太半還方珍膳必登庖厨翹禽毛羽用爲玩飾買以供官于  
倍其價人愁不堪離棄室宇長吏扣扉而達曙猛犬迎吠而終夕



自燕趙跨於齊韓江淮入於襄鄧東周洛邑之地西秦隴山之右  
僭爲交侵盜賊充斥官觀鞠爲茂草鄉亭絕其烟火人相啖食十  
而四五關中癘疫炎旱傷稼代王開永豐之粟以振饑人去倉數  
百里老幼雲集吏在貪殘官無攸次咸資錕貨動移旬月頓臥墟  
野欲返不能死人如積不可勝計雖復皇王撫運天祿有終而隋  
氏之亡亦由於此馬遷爲平準書班固述食貨志上下數千載損  
益粗舉自此史官曾無概見夫厥初生人食貨爲本聖王割廬井  
以業之通貨財以富之富而教之仁義以之興貧而爲盜刑罰不  
能止故爲食貨志用編前書之末云  
晉自中原喪亂元帝寓居江左百姓之自拔南奔者並謂之僑人  
皆取舊壤之名僑立郡縣往往散居無有土著而江南之俗火耕  
水耨土地卑濕無有蓄積之資諸蠻俚洞霜沐王化者各隨輕

重收其賸物以裨國用又嶺外酋帥因生口翡翠明珠犀象之饒  
雄於鄉曲者朝廷多因而署之以收其利歷宋齊梁陳皆因而不  
改其軍國所須雜物隨土所出臨時折課市取乃無恒法定令列  
州郡縣制其任土所出以爲徵賦其無貫之人不樂州縣編戶者  
謂之浮浪人樂輸亦無定數任量准所輸終優於正課焉都下人  
多爲諸王公貴人左右佃客典計衣食客之類皆無課役官品第  
一第二佃客無過四十戶第三品三十五戶第四品三十戶第五  
品二十五戶第六品二十戶第七品十五戶第八品十戶第九品  
五戶其佃穀皆與大家量分其典計官品第一第二置三人第三  
第四置二人第五第六及公府參軍殿中監監軍長史司馬部曲  
督關外侯材官議郎已上一人皆通在佃客數中官品第六已上  
并得衣食客三人第七第八二人第九品及輦輦跡禽前驅由基



鹽弩司馬羽林郎殿中冗從武賁殿中武賁持椎斧武騎武賁持  
鉞冗從武賁命中武賁武騎一人客皆注家籍其課丁男調布絹  
各二丈絲三兩綿八兩祿絹八尺祿綿三兩二分租米五石祿米  
二石丁女並半之男女年十六已上至六十爲丁男年十六亦半  
課年十八正課六十六免課女以嫁者爲丁若在室者年二十乃  
爲丁其男丁每歲役不過二十日又率十八人出一運丁役之其  
田畝稅米二斗蓋大率如此其度量斗則三斗當今一斗稱則三  
兩當今一兩尺則一尺二寸當今一尺其倉京都有龍首倉卽石  
頭津倉也臺城內倉南塘倉常平倉東西太倉東宮倉所貯總不  
過五十餘萬在外有豫章倉鈞磯倉錢塘倉並是大貯備之處自  
餘諸州郡臺傳亦各有倉大抵自侯景之亂國用常徧京官文武  
月別唯得稟食多遙帶一郡縣官而取其祿秩焉揚徐等大州比

令僕班寧桂等小州比參軍班丹楊吳郡會稽等郡同太子詹事  
尚書班高涼晉康等小郡三班而已大縣六班小縣兩轉方至一  
班品第旣殊不可妄載州郡縣祿米絹布絲綿當處輸臺傳倉庫  
若給刺史守令等先准其所部文武人物多少由敕而裁凡如此  
祿秩旣通所部兵士給之其家所得蓋少諸王諸王出閣就第婚  
寇所須及衣裳服飾并酒米魚鮭香油紙燭等並官給之王及王  
婿外祿者不給解任還京仍亦公給云

魏自永安之後政道陵夷寇亂實繁農商失業官有征伐皆權調  
於人猶不足以相資奉乃令所在迭相糾發百姓愁怨無復聊生  
尋而六鎮擾亂相率內徙寓食於齊晉之郊齊神武因之以成大  
業魏武西遷連年戰爭河洛之間又並空竭天平元年遷都於鄴  
出粟一百三十萬石以振貧人是時六坊之衆從武帝而西者不



能萬人餘皆北徙並給常廩春秋二時賜帛以供衣服之費常調之外逐豐稔之處折絹糴粟以充國儲於諸州緣河津濟皆官倉貯積以擬漕運於滄瀛幽青四州之境傍海置鹽官以煮鹽每歲收錢軍國之資得以周贍自是之後倉廩充實雖有水旱凶饑之處皆仰開倉以振之元象興和之中頻歲大穰穀斛至九錢是時法網寬弛百姓多離舊居闕於徭賦神武乃命孫騰高隆之分括無籍之戶得六十餘萬於是僑居者各勒還本屬是後租調之入有加焉及文襄嗣業侯景背叛河南之地困於兵革尋而侯景亂梁乃命行臺辛術略有淮南之地其新附州郡羈縻輕稅而已及文宣受禪多所創革六坊之內徙者更加簡練每一人必當百人任其臨陣必死然後取之謂之百保鮮卑又簡華人之勇力絕倫者謂之勇士以備邊要始立九等之戶富者稅其錢貧者役其力

北興長城之役南有金陵之戰其後南征諸將頻歲陷沒十馬死者以數十萬計重以修創臺殿所役甚廣而帝刑罰酷濫吏道因而成姦豪黨兼并戶口益多隱漏舊制未娶者輸半牀租調陽翟一郡戶至數萬籍多無妻有司劾之帝以爲生事由是姦欺尤甚戶口租調十亡六七是時用度轉度賜與無節府藏之積不足以供乃減百官之祿撤軍人常廩併省州郡縣鎮戍之職又制刺史守宰行兼者並不給幹以節國之費用焉天保八年議徙冀定瀛無田之人謂之樂遷於幽州范陽寬鄉以處之百姓驚擾屬以頻歲不熟米糴踊貴矣廢帝乾明中尚書左丞蘇瓌芝議修石鼈等屯歲收數萬石自是淮南軍防糧廩充足孝昭皇建中平州刺史嵇曄建議開幽州督亢舊陂長城左右管屯歲收稻粟數十萬石北境得以周贍又於河內置懷義等屯以給河南之費自是稍止



轉輸之勞至河清三年定令乃命人居十家爲比隣五十家爲閭里百家爲族黨男子十八以上六十五以下爲丁十六已上十七已下爲中六十六已上爲老十五已下爲小率以十八受田輸租調二十充兵六十免力役六十六退田免租調京城四面諸坊之外三十里內爲公田受公田者三縣代遷內執事官一品已下逮于羽林武賁各有差其外畿郡華人官第一品已下羽林武賁已上各有差職事及百姓請墾田者名爲永田奴婢受田者親王止三百人嗣王止二百人第二品嗣王已下及庶姓王止一百五十人正三品已上及皇宗止一百人七品已上限制八十人八品已下至庶人限制六十人奴婢限外不給田者皆不輸其方百里外及州人一夫受露田八十畝婦四十畝奴婢依良人限數與在京百官同丁牛一頭受田六十畝限止四年又每丁給永業二十畝

爲桑田其中種桑五十根榆三根棗五根不在還受之限非此田者悉入還受之分土不宜桑者給麻田如桑田法率人一牀調絹一匹綿八兩凡十斤綿中折一斤作絲墾租二石義租五斗奴婢各准良人之半牛調二尺墾租一斗義租五升墾租送臺義租納郡以備水旱墾租皆依貧富爲三梟其賦稅常調則少者直出上戶中者及中戶多者及下戶上梟輸遠處中梟輸次遠下梟輸當州倉三年一校焉租入臺者五百里內輸粟五百里外輸米入州鎮者輸粟人欲輸錢者准上絹收錢諸州郡皆別置富人倉初立之日准所領中下戶口數得支一年之糧逐當州穀價賤時斟酌割當年義租克入穀貴下價糶之賤則還用所糶之物依價糶貯每歲春月各依鄉土早晚課入農桑自春及秋男二十五已上皆布田畝桑蠶之月婦女十五已上皆營蠶桑孟冬刺史聽審邦教



之優劣定殿最之科品有人力無牛或有牛無力者須令相便  
皆得納種使地無遺利人無遊手焉緣邊城守之地堪墾食者皆  
營屯田置都使子使以統之一子使當田五十頃歲終考其所入  
以論褒貶是時頻歲大水州郡多遇沉溺穀價騰踊朝廷遣使開  
倉從貴價以糶之而百姓無益饑饉尤甚重以疾疫相乘死者十  
四五焉至大統中又毀東宮造脩文偃武隆基嬪嬙諸院起玳瑁  
樓又於遊豫園穿池周以列館中起三山構臺以象滄海并大修  
佛寺勞役鉅萬計財用不給乃減朝士之祿斷諸曹糧膳及九州  
軍人常賜以供之武平之後權幸竝進賜與無限加之旱蝗國用  
轉屈乃料境內六等富人調令出錢而給事黃門侍郎顏之推奏  
請立關市邸店之稅開府鄧長顓贊成之後王大悅於是以其所  
入以供御府聲色之費軍國之用不豫焉未幾而亡

後周太祖作相創制六官載師掌任土之法辨夫家田里之數會  
六畜車乘之稽審賦役斂施之節制畿疆修廣之域頒施惠之要  
審牧產之政司均掌田里之政令凡人口十已上宅五畝口九以  
上宅四畝五口已下宅二畝有室者田百四十畝丁者田百畝司  
賦掌功賦之政令凡人自十八以至六十有四與輕癯者皆賦之  
其賦之法有室者歲不過絹一疋綿八兩粟五斛丁者半之其非  
桑土有室者布一疋麻十斤丁者又半之豐年則全賦中年半之  
下年一作三之皆以時徵焉若艱凶札則不徵其賦司役掌力役之政  
令凡人自十八以至五十有九皆任於役豐年不過三旬中年則  
二旬下年則一旬凡起徒役無過家一人其人有年八十者一子  
不從役百年者家不從役廢疾非人不養者一人不從役若凶札  
又無力征掌鹽掌四鹽之政令一曰散鹽煮海以成之二曰鹽鹽



引池以化之三日形鹽物地以出之四曰飴鹽於戎以取之凡鹽  
鹽形鹽每地爲之禁百姓取之皆稅焉司倉掌辨九穀之物以量  
國用國用足卽蓄其餘以待凶荒不足則止餘用足則以粟貸人  
春頒之秋斂之

閔帝元年初除市門稅及宣帝卽位復興入市之稅武帝保定元  
年改八丁兵爲十二丁兵率歲一月役建德二年改軍士爲侍官  
募百姓充之除其縣籍是後夏人半爲兵矣宣帝時發山東諸州  
增一月功爲四十五日役以起洛陽宮并移相州六府於洛陽稱  
東京六府

武帝保定二年正月初於蒲州開河渠同州開龍首渠以廣溉灌  
高祖登庸罷東京之役除入市之稅是時尉迴王謙司馬消難相  
次叛逆與師誅討賞費鉅萬及受禪又遷都發山東丁毀造宮室

仍依周制役丁爲十二番匠則六番及頒新令制人五家爲保保  
有長保五爲閭閻四爲族皆有正畿外置里正比閭正黨長比族  
正以相檢察焉男女三歲已下爲黃十歲已下爲小十七已下爲  
中十八已上爲丁丁從課役六十爲老乃免自諸王已下至於都  
督皆給永業田各有差多者至一百頃少者至四十畝其丁男中  
男永業露田皆遵後齊之制竝課樹以桑榆及棗其園宅率三口  
給一畝奴婢則五口給一畝丁男一牀租粟三石桑土調以絹絕  
麻土以布絹絕以疋加綿三兩布以端加麻三斤單丁及僕隸各  
半之未受地者皆不課有品爵及孝子順孫義夫節婦竝免課役  
京官又給職分田一品者給田五頃每品以五十畝爲差至五品  
則爲田三頃六品二頃五畝其下每品以五十畝爲差至九品  
爲一頃外官亦各有職分田又給公廩田以供公用



開皇三年正月帝入新宮初令軍人以二十一歲丁減十二番每歲爲二十日役減調絹一疋爲二丈先是尚依周末之弊官置酒坊收利鹽池鹽井皆禁百姓採用至是罷酒坊通鹽池鹽井與百姓共之遠近大悅是時突厥犯塞吐谷渾寇邊軍旅數起轉輸勞弊帝乃令朔州總管趙仲卿於長城以北大興屯田以實塞下又於河西勒百姓立堡營田積穀京師置常平監是時山東尚承齊俗機巧姦僞避役惰遊者十六七四方疲人或詐老詐小規免租賦高祖令州縣大索貌閱戶口不實者正長遠配而又開相糾之科大功已下兼令析籍各爲戶頭以防容隱於是計帳進四十四萬三千丁新附一百六十四萬一千五百口高頴又以人間課輸雖有定分年常徵納除注恒多長吏肆情文帳出沒復無定簿難以推校乃爲輸籍定樣請徧下諸州每年正月五日縣令巡人各

隨便近五黨三黨共爲一團依樣定戶上下帝從之自是姦無所容矣時百姓承平日久雖數遭水旱而戶口歲增諸州調物每歲河南自潼關河北自蒲坂達于京師相屬於路晝夜不絕者數月帝旣躬履儉約六宮咸服澣濯之衣乘輿供御有故弊者隨令補用皆不改作非享燕之事所食不過一肉而已有司嘗進乾薑以布袋貯之帝用爲傷費大加譴責後進香復以瓊袋因答所司以爲後誠焉由是內外率職府帑充實百官祿賜及賞功臣皆出於豐厚焉九年陳平帝親御朱雀門勞凱旋師因行慶賞自門外夾道列牛帛之積達於南郭以次頒給所費三百餘萬段帝以江表初定給復十年自餘諸州竝免當年租賦十年五月又以宇內無事益寬徭賦百姓年五十者輸庸停防十一年江南又反越國公楊素討平之師還賜物甚廣其餘出師命賞亦莫不優隆十二年



有司上言庫藏皆滿帝曰朕既薄賦於人又大經賜用何得爾也對曰用處常出納處常入略計每年賜用至數百萬段曾無減損於是乃更闢左藏之院構屋以受之下詔曰既富而教方知廉恥寧積於人無藏府庫河北河東今年田租三分減一兵減半功調全免時天下戶口歲增京輔及三河地少而入衆衣食不給議者咸欲徙就寬鄉其年冬帝命諸州考使議之又令尚書以其事策問四方貢士竟無長算帝乃發使四出均天下之田其狹鄉每丁纔至二十畝老小又少焉十三年帝命楊素出於岐州北造仁壽宮素遂夷山堙谷營構觀宇崇臺累榭宛轉相屬役使嚴急丁夫多死疲弊顛仆者推填坑坎覆以土石因而築爲平地死者以萬數宮成帝行幸焉時方暑月而死人相次於道素乃一切焚除之帝頗知其事甚不悅及入新宮遊觀乃喜又謂素爲忠後帝以歲

暮晚日登仁壽殿周望原墜見宮外燐火彌漫又聞哭聲令左右觀之報曰鬼火帝曰此等工役而死旣屬年暮魂魄思歸耶乃令灑酒宣敕以咒遣之自是乃息

開皇三年朝廷以京師倉廩尚虛議爲水旱之備於是詔於蒲陝虢熊伊洛鄭懷邵衛汴許汝等水次十三州置募運米丁又於衛州置黎陽倉洛州置河陽倉陝州置常平倉華州置廣通倉轉相灌注漕關東及汾晉之粟以給京師又遣倉部侍郎韋曠向蒲陝以東募人能於洛陽運米四十石經砥柱之險達於常平者免其征戍其後以渭水多沙流有深淺漕者苦之四年詔曰京邑所居五方輻湊重關四塞水陸艱難大河之流波瀾東注百川海瀆萬里交通雖三門之下或有危慮若發自小平陸運至陝還從河水入於渭川兼及上流控引汾晉舟車來去爲益殊廣而渭川水力



大小無常流淺沙深卽成阻閼計其途路數百而已動移氣序不能往復汎舟之役人亦勞止朕君臨區寓興利除害公私之弊情實愍之故東發潼關西引渭水因藉人力開通漕渠量事程功易可成就已令工匠巡歷渠道觀地理之宜審終久之義一得開鑿萬代無毀可使官及私家方舟巨舫晨昏漕運汭沂不停旬日之功堪省億萬誠知時當炎暑動致疲勤然不有暫勞安能永逸宣告人庶知朕意焉於是命宇文愷率水工鑿渠引渭水自大興城東至潼關三百餘里名曰廣通渠轉運通利關內賴之諸州水旱凶饑之處亦便開倉振給五年五月工部尚書襄陽縣公長孫平奏曰古者三年耕而餘一年之積九年作而有三年之儲雖水旱爲災而人無菜色皆由勸導有方蓄積先備故也去年元陽關內不熟陛下哀愍黎元甚於赤子運山東之粟置常平之官開發倉

廩普加振賜少食之人莫不豐足鴻恩大德前古未比其強宗富室家道有餘者皆競出私財遞相贖贍此乃風行州偃從化而然但經國之理須存定式於是奏令諸州百姓及軍人勸課當社共立義倉收穫之日隨其所得勸課出粟及麥於當社造倉窖貯之卽委社司執帳檢校每年收積勿使損敗若時或不熟當社有饑饉者卽以此穀振給自是諸州儲峙委積其後關中連年大旱而青兗汴許曹亳陳仁譙豫鄭洛伊潁邳等州大水百姓饑饉高祖乃命蘇威等分道開倉振給又命司農丞王亶發廣通之粟三百餘萬石以拯關中又發故城中周代舊粟賤糶與人買牛驢六千餘頭分給尤貧者令往關東就食其遭水旱之州皆免其年租賦十四年關中大旱人饑上幸洛陽因令百姓就食從官竝准見口振給不以官位爲限明年東巡狩因祠泰山是時義倉貯在人間



多有費損十五年二月詔曰本置義倉止防水旱百姓之徒不思  
久計輕爾費損於後乏絕又北境諸州異於餘處雲夏長靈鹽蘭  
豐鄯涼甘瓜等州所有義倉雜種竝納本州若人有早儉少糧先  
給雜種及遠年粟十六年正月又詔秦疊成康武文芳宥旭洮岷  
渭紀河廓幽隴涇寧原敷丹延綏銀扶等州社倉竝於當縣安置  
二月又詔社倉准上中下三等稅上戶不過一石中戶不過七斗  
下戶不過四斗其後山東頻年霖雨杞宋陳亳曹戴譙穎等諸州  
達於滄海皆困水災所在沉溺十八年天子遣使將水工巡行川  
源相視高下發隨近丁以疏導之困乏者開倉振給前後用穀五  
百餘石遭水之處租調皆免自是頻有年矣

開皇八年五月高頴奏諸州無課調處及課州管戶數少者官人  
祿力乘前已來恒出隨近之州但判官本爲牧人役力理出所部  
請於所管戶內計戶徵稅帝從之先是京官及諸州竝給公廩錢  
迴易取利以給公用至十四年六月工部尚書安平郡公蘇孝慈  
等以爲所在官司因循往昔以公廩錢物出舉興生唯利是求煩  
擾百姓敗損風俗莫斯之甚於是奏皆給地以營農迴易取利一  
皆禁止十七年十一月詔在京及在外諸司公廩在市迴易及諸  
處興生竝聽之唯禁出舉收利云

煬帝卽位是時戶口益多府庫盈溢乃除婦人及奴婢部曲之課  
男子以二十二成丁始建東都以尚書令楊素爲營作大監每月  
役丁二百萬人徙洛州郭內人及天下諸州富商大賈數萬家以  
實之新置興洛及迴洛倉又於阜瀾營顯仁宮苑圍連接北至新  
安南及飛山西至澠池周圍數百里課天下諸州各貢草木花果  
奇禽異獸於其中開渠引穀洛水自苑西入而東注於洛又自板



渚引河達于淮海謂之御河河畔築御道樹以柳又命黃門侍郎  
王弘上儀同於士澄往江南諸州採大木引至東都所經州縣遞  
送往返首尾相屬不絕者千里而東都役使促迫僵仆而斃者十  
四五焉每月載死丁東至城阜北至河陽車相望於道時帝將事  
遼碣增置軍府掃地爲兵自是租賦之入益減矣又造龍舟鳳舸  
黃龍赤艦樓船箴舫募諸水工謂之殿脚衣錦行勝執青絲攬挽  
船以幸江都帝御龍舟文武官五品已上給樓船九品已上給黃  
箴舫舳艫相接二百餘里所經州縣竝令供頓獻食豐辦者加官  
賞闕乏者譴至死又盛修車輿輦輅旌旗羽儀之飾課天下州縣  
凡骨角齒牙皮革毛羽可飾器用堪爲斃眊者皆責焉徵發倉卒  
朝命夕辦百姓求捕網罟徧野水陸禽獸殆盡猶不能給而買於  
豪富蓄積之家其價騰踊是歲翟雉尾一直十縑白鷺鮮半之乃

使屯田主事常駿使赤土國致羅刹又使朝請大夫張鎮州擊流  
求俘虜數萬士卒深入蒙犯瘴癘餒疾而死者十八九又以西域  
多諸寶物令裴矩往張掖監諸商胡互市啖之以利勸令入朝自  
是西域諸蕃往來相繼所經州郡疲於送迎糜費以萬萬計明年  
帝北巡狩又興衆百萬北築長城西距榆林東至紫河綿亘千餘  
里死者大半四年發河北諸郡百餘萬衆引沁水南達于河北通  
涿郡自是以丁男不供始以婦人從役五年西巡河右西域諸胡  
佩金玉被錦罽香奏樂迎候道左帝乃令武威張掖士女盛飾  
縱觀衣服車馬不鮮者州縣督課以誇示之其年帝親征吐谷渾  
破之於赤水慕容佛允委其家屬西奔青海帝駐兵不出遇天霖  
雨經大斗拔谷士卒死者十二三焉馬驢十八九於是置河源郡  
積石鎮又於西域之地置西海鄯善且末等郡謫天下罪人配爲



成卒大開屯田發西方諸郡運糧以給之道里懸遠兼遇寇抄死亡相續六年將征高麗有司奏兵馬已多損耗詔又課天下富人量其貲產出錢市武馬填元數限令取足復黠兵具器仗皆令精新濫惡則使人便斬於是馬匹至十萬七年冬大會涿郡分江淮南兵配驍衛大將軍來護兒別以舟師濟滄海舳艫數百里竝載軍糧期與大兵會平壤是歲山東河南大水漂沒四十餘郡重以遼東覆敗死者數十萬因屬疫疾山東尤甚所在皆以徵斂供帳軍旅所資爲務百姓雖困而弗之恤也每急徭卒賦有所徵求長吏必先賤買之然後宣下乃貴賣與人且募之間價盈數倍哀刻徵斂取辦一時彊者聚而爲盜弱者自賣爲奴婢九年詔又課關中富人計其貲產出驢往伊吾河源且未滿運糧多者至數百頭每頭價至萬餘又發諸州丁分爲四番於遼西柳城營屯往來艱苦

生業盡罄盜賊四起道路南絕隴右牧馬盡爲奴賊所掠楊玄感乘虛爲亂時帝在遼東聞之遽歸於高陽郡及玄感平帝謂侍臣曰玄感一呼而從者如市益知天下人不欲多多則爲賊不盡誅後無以示勸乃令裴蘊窮其黨與詔郡縣坑殺之死者不可勝數所在驚駭舉天下之人十分九爲盜賊皆盜武馬始作長槍攻陷城邑帝又命郡縣置督捕以討賊益遣募人征遼馬少不充八馱而許爲六馱又不足聽半以驢充在路逃者相繼執獲皆斬之而莫能止帝不憚遇高麗執送叛臣斛斯政遣使求降發詔赦之囚政至于京師於開遠門外磔而射殺之遂幸太原爲突厥圍於鴈門突厥等散還洛陽募益驍果以充舊數是時百姓廢業屯集城堡無以自給然所在倉庫猶大充物吏皆懼法莫肯振救由是益困初皆剝樹皮以食之漸及於葉皮葉皆盡乃煮土或搗糞爲



末而食之其後人乃相食十二年帝幸江都是時李密據洛口倉聚衆百萬越王侗與段達等守東都東都城內糧盡布帛山積乃以絹爲汲綆然布以麩代吾傳宋本議與衛玄守京師百姓饑饉亦不能救義師入長安發永豐倉以振之百姓方蘇息矣

晉自過江凡貨賣奴婢馬牛田宅有文券率錢一萬輸估四百入官賣者三百買者一百無文券者隨物所堪亦百分收四名爲散估歷宋齊梁陳如此以爲常以人競商販不爲田業故使均輸欲爲懲勵雖以此爲辭其實利在侵削又都西有石頭津東有方山津各置津主一人賊曹一人直水五人以察禁物及亡叛者其荻炭魚薪之類過津者竝十分稅一以其東路無禁貨故方山津檢察甚簡淮水北有大市百餘小餘所大市備置官司稅斂旣重時甚苦之

梁初唯京師及三吳荆郢江湘梁益用錢其餘州郡則雜以穀帛交易交廣之域全以金銀爲貨武帝乃鑄錢肉好周郭文曰五銖重如其文而又別鑄除其肉郭謂之女錢二品竝行百姓或私以古錢交易有直百五銖五銖女錢太平百錢定平一百五銖雉錢五銖對文等號輕重不一天子頻下詔書非新鑄二種之錢竝不許用而趣利之徒私用轉甚至普通中乃議盡罷銅錢更鑄鐵錢人以鐵賤易得竝皆私鑄及大同已後所在鐵錢遂如丘山物價騰貴交易者以車載錢不復計數而唯論貫商旅姦詐因之以求利自破嶺以東八十爲百名曰東錢江郢已上七十爲百名曰西錢京師以九十爲百名曰長錢中大同元年天子乃詔通用足陌詔下而人不從錢陌益少至于末年遂以三十五爲百云陳初承梁喪亂之後鐵錢不行始梁末又有兩柱錢及鵝眼錢於



時人雜用其價同但兩柱重而鵝眼輕私家多鑄錢又聞以錫鐵兼以粟帛為貨至文帝天嘉五年改鑄五銖初出一當鵝眼之十宣帝大建十一年又鑄大貨六銖以一當五銖之十與五銖並行後還當一人皆不便乃相與訛言曰六銖錢有不利縣官之象未幾而帝崩遂廢六銖而行五銖竟至陳亡其嶺南諸州多以鹽米布交易俱不用錢云

齊神武霸政之初承魏猶用永安五銖遷鄴已後百姓私鑄體制漸別遂各以為名有雍州青赤梁州生厚紫錢吉錢河陽生澀天柱赤牽之稱冀州之北錢皆不行交貿者皆絹布神武帝乃收境內之銅及錢仍依舊文更鑄流之四境未幾之間漸復細薄姦偽競起文宣受禪除永安之錢改鑄常平五銖重如其文其錢甚貴且制造甚精至乾明皇建之間往往私鑄鄴中用錢有赤熟青熟

細眉赤生之異河南所用有青薄鉛錫之別青齊徐兗梁豫州輩類各殊武平已後私鑄轉甚或以生鐵和銅至于齊亡卒不能禁後周之初尚用魏錢及武帝保定元年七月乃更鑄布泉之錢以一當五與五銖並行時梁益之境又雜用古錢交易河西諸郡或用西域金銀之錢而官不禁建德三年六月更鑄五行大布錢以一當十大收商估之利與布泉錢並行四年七月又以邊境之上人多盜鑄乃禁五行大布不得出入四關布泉之錢聽入而不聽出五年正月以布泉漸賤而人不用遂廢之初令私鑄者絞從者遠配為戶齊平已後山東之人猶雜用齊氏舊錢至宣帝大象元年十一月又鑄永通萬國錢以一當十與五行大布及五銖凡三品竝用高祖既受周禪以天下錢貨輕重不等乃更鑄新錢背面肉好皆有周郭文曰五銖而重如其文每錢一千重四斤二兩是



時錢既新出百姓或以私有鑄鑄三年四月詔四面諸關各付百錢  
為樣從關外來勘樣相似然後得過樣不同者即壞以為銅入官  
詔行新錢已後前代舊錢有五行大布永通萬國及齊常平所在  
用以貿易不止四年詔仍依舊不禁者縣令奪半年祿然百姓習  
用既久尚猶不絕五年正月詔又嚴其制自是錢貨始一所在流  
布百姓便之是時見用之錢皆須和以錫鑑錫鑑既賤求利者多  
私鑄之錢不可禁約其年詔乃禁出錫鑑之處竝不得私有採取  
十年詔晉王廣宗聽於揚州立五鑪鑄錢其後姦狡稍漸磨鑪錢郭  
取銅私鑄又雜以錫錢遞相放效錢遂輕薄乃下惡錢之禁京師  
及諸州邸肆之上皆令立榜置樣為准不中樣者不入於市十八  
年詔漢王諒聽於并州立五鑪鑄錢是時江南人間錢少晉王廣宗  
又聽于鄂州白紵山有銅鉞處錮銅鑄錢於是詔聽置十鑪鑄錢

又詔蜀王秀聽於益州立五鑪鑄錢是時錢益濫惡乃令有司括  
天下邸肆見錢非官鑄者皆毀之其銅入官而京師以惡錢貿易  
為吏所執有死者數年之間私鑄頗息大業已後王綱弛紊巨姦  
大猾遂多私鑄錢轉薄惡初每千猶重二斤後漸輕至一斤或翦  
鐵鏃裁皮糊紙以為錢相雜用之貨賤物貴以至於亡

以爲精雅禮義以爲制紀...  
而無用...  
格心教之以政...  
此字入必兼...  
江州嘉祥...  
...







陳乎原野而肆諸市朝其所由來亦已久矣若夫龍宮之歲鳳紀  
之前結繩而不違不令而人畏五帝畫象殊其衣服三王肉刑刻  
其膚體若重華之眚災肆赦文命之刑罰三千而都君卹刑尚奉  
唐堯之德高密泣罪猶懷虞舜之心殷因以降去德滋遠若紂能  
遵成湯不造炮烙設刑兼禮守位依仁則西伯斂轡化爲田叟周  
王立三刺以不濫弘三宥以開物成康以四十二年之間刑厝不  
用薰風潛暢頌聲遐舉越裳重譯萬里來歸若乃魯接燕齊荆鄰  
鄭晉時之所尚資乎辯舌國之所恃不在威刑是以纜鼓夷蒐宣  
尼致誚旣鑄刑辟叔向貽書夫渤海之浸沾濡千里列國之政豈  
周之膏潤者歟秦氏僻自西戎初平區夏於時投戈棄甲仰恩祈  
惠乃落嚴霜於政教揮流電於邦國棄灰偶語生愁怨於前毒網  
凝科害肌膚於後玄鉞肆於朝市赭服飄於路衢將閭有一劍之

哀茅焦請列星之數漢高祖初以三章之約以慰秦人孝文躬親  
玄默遂疎天網孝宣樞機周密法理詳備選于定國爲廷尉黃霸  
以爲廷平每以季秋之後諸所請讞帝常幸宣室齋居決事明察  
平恕號爲寬簡光武中興不移其舊是以二漢群后罕聞殘酷魏  
武造易鉞之科明皇施減死之令中原凋弊吳蜀三分哀矜折獄  
亦所未暇晉氏平吳九州寧一乃命賈充大明刑憲內以平章百  
姓外以和協萬邦寔曰輕平稱爲簡易是以宋齊方駕輔其餘軌  
若亦刑隨喜怒道睽正直布憲擬於秋荼設網踰於朝脛恣興夷  
翦取快情靈若隋高祖之揮刃無辜齊文宣之輕刀鬻割此謂匹  
夫私讎非關國典孔子曰刑亂及諸政政亂及諸身心之所詣則  
善惡之本原也彪約所製無刑法篇臧蕭之書又多漏略是以撮  
其遺事以至隋氏附於篇云



梁武帝承齊昏虐之餘刑政多僻既即位乃制權輿依周漢舊事有罪者贖其科凡在官身犯罰金鞭杖杖督之罪悉入贖停罰其臺省令史士卒欲贖者聽之時欲議定律令得齊時舊郎濟陽蔡法度家傳律學云齊武時刪定郎王植之集註張杜舊律合爲一書凡一千五百三十條事未施行其文殆滅法度能言之於是爲兼尚書刪定郎使損益植之舊本以爲梁律天監元年八月乃下詔曰律令不一實難去弊殺傷有法昏墨有刑此蓋常科易爲條例至如三男一妻懸首造獄事非慮內法出恒鈞前王之律後王之令因循剝附良各有以若遊辭費句無取於實錄者宜悉除之求文指歸可適變者載一家爲本川衆家以附景丁俱有則去丁以存景若景丁二事注釋不同則一家兼載咸使百司議其可不取其可安以爲標例宜云某等如十人同議以此爲長則定以

爲梁律留尚書比部悉使備文若班下州郡止撮機要可無二門侮法之弊法度又請曰魏晉撰律止關數人今若皆諮列位恐緩而無決於是以前尚書令王亮侍中王瑩尚書僕射沈約吏部尚書范雲長兼侍中柳惲給事黃門侍郎傅昭通直散騎常侍孔藹御史中丞樂藹太常丞許懋等參議斷定定爲二十篇一曰刑名二曰法例三曰盜劫四曰賊叛五曰詐僞六曰受賕七曰告劾八曰討捕九曰繫訊十曰斷獄十一曰雜十二曰戶十三曰擅興十四曰毀亡十五曰衛宮十六曰水火十七曰倉庫十八曰廐十九曰關市二十曰違制其制刑爲十五等之差棄市已上爲死罪大罪梟其首其次棄市刑二歲已上爲耐罪言各隨技能而任使之也有髡鉗五歲刑笞二百收贖絹男子六十疋又有四歲刑男子四十八疋又有三歲刑男子三十六疋又有二歲刑男子二十四疋



罰金一兩已上為贖罪贖死者金二斤男子十六疋贖髡五歲  
刑笞二百者金一斤十二兩男子十四疋贖四歲刑者金一斤八  
兩男子十二疋贖三歲刑者金一斤四兩男子十疋贖二歲刑者  
金一斤男子八疋罰金十二兩者男子六疋罰金八兩者男子四  
疋罰金四兩者男子二疋罰金二兩者男子一疋罰金一兩者男  
子二丈女子各半之五刑不簡正於五罰五罰不服正於五過以  
贖論故為此十五等之差又制九等之差有一歲刑半歲刑百日  
刑鞭杖二百鞭杖一百鞭杖五十鞭杖三十鞭杖二十鞭杖一十  
有八等之差一曰免官加杖督一百二曰免官三曰奪勞百日杖  
督一百四曰杖督一百五曰杖督五十六曰杖督三十七曰杖督  
二十八曰杖督一十論加者上就次當減者下就次凡繫獄者不  
即答款應加測罰不得以人事為隔若人事犯罰違扞不款宜測

罰者先參議牒啓然後科行斷食三日聽家人進粥二升女及老  
小一百五十刻乃與粥滿千刻而止囚有械梃升械及鉗竝立輕  
重大小之差而為定制其鞭制鞭法鞭常鞭凡三等之差制鞭  
生革廉成法鞭生革去廉常鞭熟韃不去廉皆作鶴頭紐長一尺  
一寸梢長二尺七寸廣三寸靶長二尺五寸杖皆用生荆長六尺  
有大杖法杖小杖三等之差大杖大頭圍一寸三分小頭圍八分  
半法杖圍一寸三分小頭五分小杖圍一寸一分小頭極杪諸督  
罰大罪無過五十三小者二十當笞二百以上者笞半餘半後  
決中分鞭杖老小於律令當得鞭杖罰者皆半之其應得法鞭杖  
者以熟韃鞭小杖過五十者稍行之將吏已上及女人應有罰者  
以罰金代之其以職員應罰及律令指名制罰者不用此令其問  
事諸罰皆用熟韃鞭小杖其制鞭制杖法鞭法杖自非特詔皆不



得用詔鞭杖在京師者皆於雲龍門行女子懷孕者勿得決罰其  
謀反降叛大逆已上皆斬父子同產男無少長皆棄市母妻姊妹  
及應從坐棄市者妻子女妾同補奚官爲奴婢貲財沒官劫身皆  
斬妻子補兵遇赦降死者贖而爲劫字髡補冶鎖士終身其下  
又謫運配材官冶士尚方鎖士皆以輕重差其年數其重者或終  
身士人有禁錮之科亦有輕重爲差其犯清議則終身不齒耐罪  
囚八十已上十歲已下及孕者盲者侏儒當械繫者及郡國太守  
相都尉關中侯已上亭侯已上之父母妻子及所生坐非死罪除  
名之罪二千石已上非檻徵者竝頌繫之丹陽尹月一詣建康縣  
令三官參共錄獄察斷枉直其尚書當錄人之月者與尚書參共  
錄之大凡定罪二千五百二十九條二年四月癸卯法度表上新  
律又上令三十卷科三十卷帝乃以法度守廷尉卿詔班新律於

天下三年八月建安女子任提女坐誘口當死其子景慈對鞫辭  
云母實行此是時法官虞僧虬啓稱案子之事親有隱無犯直躬  
證父仲尼爲非景慈素無防閑之道死有明日之據陷親極刑傷  
和損俗凡乞鞠不審降罪一等豈得避五歲之刑忽死母之命景  
慈宜加罪辟詔流於交州至是復有徒流之罪其年十月甲子詔  
以金作權典宜在蠲息於是除贖罪之科武帝敦睦九族優借朝  
士有犯罪者皆諷群下屈法申之百姓有罪皆案之以法其緣坐  
則老幼不免一人亡逃則舉家質作人既窮急姦宄益深後帝親  
謁南郊秣陵老人遮帝曰陛下爲法急於黎庶緩於權貴非長久  
之術誠能反是天下幸甚帝於是思有以寬之舊獄法夫有罪逮  
妻子子有罪逮父母十一年正月壬辰乃下詔曰自今捕謫之家  
及罪應質作若年有老小者可停將送十四年又除贖面之刑帝



銳意儒雅疎簡刑法自公卿大臣咸不以鞫獄留意姦吏招權巧  
文弄法貨賄成市多致枉濫大率二歲刑已上歲至五千人是時  
徒居作者具五任其無任者著升械若疾病權解之是後囚徒或  
有優劇大同中皇太子在春宮視事見而愍之乃上疏曰臣以比  
時奉敕權親京師雜事切見南北郊壇材官車府太官下省左裝  
等處上啓竝請四五歲已下輕囚助充使役自有刑均罪等憊目  
不異而甲付錢署乙配郊壇錢署三所於辛爲劇郊壇六處在役  
則優今聽獄官詳其可否舞文之路自此而生公平難遇其人流  
泉易啓其齒將恐玉科重輕全關墨綬金書去取更由丹筆愚謂  
宜詳立條制以爲永准帝手救報曰頃年已來處處之役唯貧徒  
謫逐急充配若科制繁細義同簡約切須之處終不可得引例與  
訟紛紜方始防杜姦巧自是爲難更當別思取其便也竟弗之從

是時王侯子弟皆長而騷擾不法武帝年老厭於萬機又專精佛  
戒每斷重罪則終日弗釋嘗遊南苑臨川王宏伏人於橋下將欲  
爲逆事覺有司請誅之帝但泣而讓曰我人才十倍於爾處此恒  
懷戰懼爾何爲者我豈不能行周公之事念汝愚故也免所居官  
頃之還復本職由是王侯驕橫轉甚或白日殺人於都街劫賊亡  
命咸於王家自匿薄暮塵起則剝掠行路謂之打稽武帝深知其  
弊而難於誅討十一年十月復開贖罪之科中大同元年七月甲  
子詔自今犯罪非大逆父母祖父母勿坐自是禁網漸疎百姓安  
之而貴戚之家不法尤甚矣尋而侯景逆亂及元帝卽位懲前政  
之寬且帝素苛刻及周師至獄中死囚且數千人有司請皆釋之  
以充戰士帝不許竝令棒殺之事未行而城陷敬帝卽位刑政適  
陳矣



陳氏承梁季喪亂刑典疎濶及武帝卽位思革其弊乃下詔曰朕聞唐虞道盛設畫象而不犯夏商德衰雖孥戮其未備洎乎末代綱目滋繁矧屬亂離憲章遺紊朕始膺寶曆思廣政樞外可搜舉良才刪改科令群僚博議務存平簡於是稍求得梁時明法吏令與尚書刪定郎范泉參定律令又敕尚書僕射沈欽吏部尚書徐陵兼尚書左丞宗元饒兼尚書左丞賀朗參知其事制律三十卷令科四十卷採酌前代條流冗雜綱目雖多博而非要其制唯重清議禁錮之科若縉紳之族犯虧名教不孝及內亂者發詔棄之終身不齒先與士人爲婚者許妻家奪之其獲賊帥及士人惡逆免死付治聽將妻入役不爲年數又存贖罪之律復父母緣坐之刑自餘篇目條綱輕重簡繁一用梁法其有賊驗顯然而不款則上測立立測者以土爲梁高一尺上圓劣容因兩足立鞭二十管

三十訖著兩械及杻上塚一上測七刻日再上三七日上測七日一行鞭凡經杖合一百五十得度不承者免死其髡鞭五歲刑降死一等鎖二重其五歲刑已下並鎖一重五歲四歲刑若有官准當二年餘並居作其三歲刑若有官准當二年餘一年贖若公坐過誤罰金其二歲刑有官者贖論一歲刑無官亦贖論寒庶人准決鞭杖以並著械徒並著鎖不計階品死罪將決乘露車著三械加壺手至市脫手械及壺手焉當刑於市者夜須明兩須晴晦朔八節六齊月在張心日並不得行刑廷尉寺爲北獄建康縣爲南獄並置正監平又制常以三月侍中吏部尚書三公郎部都令史三公錄冤局令御史中丞侍御史蘭臺令史親行京師諸獄及治署理察囚徒冤枉文帝性明察留心刑政親覽獄訟督責群下政號叢明是時承寬政之後功臣貴戚有非法帝咸以法繩之



頗號峻刻及宣帝卽位優借文武之士崇簡易之政上下便之其  
後政令既寬刑法不立又以連年北伐疲人聚爲劫盜矣後主卽  
位信任讒邪群下縱恣鬻獄成市賞罰之命不出於外後主性猜  
忍疾忘威令之行左右有忤意者動至夷戮百姓怨叛以至於  
滅

齊神武文襄並由魏相尚用舊法及文宣天保元年始命群官刊  
定魏朝麟趾格是時軍國多事政刑不一決獄定罪罕依律文相  
承謂之變法從事清河房超爲黎陽郡守有趙道德者使以書屬  
超超不發書棒殺其使文宣於是令守宰各設棒以誅屬請之使  
後都官郎中宋軌奏曰昔曹操懸棒威於亂時今施之太平未見  
其可若受使請賕猶致大戮身爲枉法何以加罪於是罷之旣而  
司徒功曹張老上書稱大齊受命已來律令未改非所以創制垂

法革人視聽於是始命群官議造齊律積年不成其決獄猶依魏  
舊是時刑政尚新吏皆奉法自六年之後帝遂以功業自矜恣行  
酷暴昏狂酌營任情喜怒爲大鑊長鋸剉碓之屬並陳於庭意有  
不快則手自屠裂或命左右鬻噉以逞其意時僕射楊遵彥乃令  
憲司先定死罪囚置于仗衛之中帝欲殺人則執以應命謂之供  
御囚經三月不殺者則免其死帝嘗幸金鳳臺受佛戒多召死囚  
編籬條爲翅命之飛下謂之放生隆皆致死帝視以爲歡笑時有  
司折獄又嘗酷法訊囚則用車輻縹杖夾指壓蹀又立之燒犁耳  
上或使以臂貫燒車缸旣不勝其苦皆致誣伏七年豫州檢使白  
鬪爲左丞盧斐所劾乃於獄中誣告斐受金文宣知其姦罔詔令  
按之果無其事乃敕八座議立案劾格負罪不得告人事於是挾  
姦者畏糾乃先加誣訟以擬當格吏不能斷又妄相引大獄動至



十人多移歲月然帝猶委政輔臣楊遵彥彌縫其闕故時議者竊云主昏於上政清於下孝昭在藩已知其失卽位之後將加懲革未幾而崩武成卽位思存輕典大寧元年乃下詔曰王者所用唯在賞罰賞貴適理罰在得情然理容進退事涉疑似監府司勳或有開塞之路三尺律令未窮畫一之道想文王之官人念宣尼之止訟刑賞之宜思獲其所自今諸應賞罰皆賞疑從重罰疑從輕又以律令不成頻加催督河清三年尚書令趙郡王叡等奏上齊律十二篇一曰名例二曰禁衛三曰婚戶四曰擅興五曰違制六曰詐僞七曰鬪訟八曰賊盜九曰捕斷十曰毀損十一曰廢牧十二曰雜其定罪九百四十九條又上新令四十卷大抵採魏晉故事其制刑名五一曰死重者輟之其次梟首竝陳屍三日無市者列於鄉亭顯處其次斬刑殊身首其次絞刑死而不殊凡四等二

曰流刑謂論犯可死原情可降鞭笞各一百髡之投於邊裔以爲兵卒未有道里之差其不合遠配者男子長徒女子配舂竝六年三曰刑罪卽耐罪也有五歲四歲三歲二歲一歲之差凡五等各加鞭一百其五歲者又加笞八十四歲者六十三歲者四十二歲者二十一歲者無笞竝鎖輪左校而不髡無係者鉗之婦人配舂及掖庭織四曰鞭有一百八十六五十四十之差凡五等五曰杖有三十二十之差凡三等大凡爲十五等當加者上就次當減者下就次贖罪舊以金皆代以中絹死一百匹流九十二匹刑五歲七十八匹四歲六十四匹三歲五十四匹二歲三十六匹各通鞭笞論一歲無笞則通鞭二十四匹鞭杖每十贖絹一匹至鞭百則絹十匹無絹之鄉皆准絹收錢自贖笞十已上至死又爲十五等之差當加減次如正決法合贖者謂流內官及爵秩比視老小



鬪疑并過失之屬犯罰絹一匹及杖十已上皆名爲罪人盜及殺人而亡者卽懸名注籍甄其一房配驛戶宗室則不注盜及不入奚官不加害刑自犯流罪已下合贖者及婦人犯刑已下侏儒篤疾癰殘非犯死罪皆訟繫之罪刑年者鎖無鎖以枷流罪已上加杻械死罪者桁之決流刑鞭笞者鞭其背五十一易執鞭人鞭鞘皆用熟皮削去廉稜鞭瘡長一尺笞者笞髻而不中身人杖長三尺五寸大頭徑二分半小頭徑一分半決三十已下杖者長四尺大頭徑三分小頭徑二分在官犯罪鞭杖十爲一負閑局六負爲一殿平局八負爲一殿繁局十負爲一殿加於殿者復計爲負焉赦日則武庫令設金雞及鼓於闔闔門外之右勒集囚徒於闕前槌鼓十聲釋枷鎖焉又列重罪十條一曰反逆二曰大逆三曰叛四曰降五曰惡逆六曰不道七曰不敬八曰不孝九曰不義十曰

內亂其犯此十者不在八議論贖之限是後法令明審科條簡要又敕仕門之子弟常講習之齊人多曉法律蓋由此也其不可爲定法者別制權令二卷與之竝行後平秦王高歸彥謀反須有約罪律無正條於是遂有別條權格與律竝行大理明法上下比附欲出則附依輕議欲入則附從重法姦吏因之舞文出沒至于後主權幸用事有不附之者陰中以法綱紀紊亂卒至於亡

周文帝之有關中也霸業初基典章多闕大統元年命有司斟酌今古通變可以益時者爲二十四條之制奏之七年又下十二條制十年魏帝命尚書蘇綽總三十六條更損益爲五卷頒於天下其後以河南趙肅爲廷尉卿撰定法律肅積思累年遂感心疾而死乃命司憲大夫託拔迪掌之至保定三年三月庚子乃就謂之大律凡二十五篇一曰刑名二曰法例三曰祀享四曰朝會五曰



婚姻六曰戶禁七曰水火八曰興繕九曰衛宮十曰市廛十一曰  
鬪競十二曰劫盜十三曰賊叛十四曰毀亡十五曰違制十六曰  
關津十七曰諸侯十八曰廩牧十九曰雜犯二十曰詐僞二十一  
曰請求二十二曰告言二十三曰逃亡二十四曰繫訊二十五曰  
斷獄大凡定罪一千五百三十七條其制罪一曰杖刑五自十至  
五十二曰鞭刑五自六十至於百三曰徒刑五徒一年者鞭六十  
笞十徒二年者鞭七十笞二十徒三年者鞭八十笞三十徒四年  
者鞭九十笞四十徒五年者鞭一百笞五十四曰流刑五流衛服  
去皇畿二千五百里者鞭一百笞六十流要服去皇畿三千里者  
鞭一百笞七十流荒服去皇畿三千五百里者鞭一百笞八十流  
鎮服去皇畿四千里者鞭一百笞九十流蕃服去皇畿四千五百  
里者鞭一百笞一百五曰死刑五一曰磔二曰絞三曰斬四曰梟五

曰裂五刑之屬各有五合二十五等不立十惡之目而重惡逆不  
道大不敬不孝不義內亂之罪凡惡逆肆之三日盜賊群攻鄉邑  
及入人家者殺之無罪若報讎者告於法而自殺之不坐經爲盜  
者注其籍唯皇宗則否凡死罪枷而拳流罪枷而梏徒罪枷鞭罪  
極杖罪散以待斷皇族及有爵者死罪已下鎖之徒已下散之獄  
成將殺者書其姓名及其罪於拳而殺之市唯皇族與有爵者隱  
獄其贖杖刑五金二兩至五兩贖鞭刑五金六兩至十兩贖徒刑五  
一年金十二兩二年十五兩三年一斤二兩四年一斤五兩五年  
一斤八兩贖流刑一斤十二兩俱役六年不以遠近爲差等贖死  
罪金二斤鞭者以一百爲限加笞者合二百止應加鞭笞者皆先  
笞後鞭婦人當笞者聽以贖論徒輸作者皆任其所能而役使之  
杖十已上當加者上就次數滿乃坐當減者死罪流蕃服蕃服已



下俱至徒五年五年已下各以一等爲差盜賊及謀反大逆降叛  
惡逆罪當流者皆甄一房配爲雜戶其爲盜賊事發逃亡者懸名  
注配若再犯徒三犯鞭者一身永配下役應贖金者鞭杖十收中  
絹一疋流徒者依限歲收絹十二疋死罪者一百疋其贖刑死罪  
五旬流刑四旬徒刑三旬鞭刑二旬杖刑一旬限外不輸者歸於  
法貧者請而免之大凡定法一千五百三十七條班之天下其大  
略滋章條流苛密比於齊法煩而不要又初除復讎之法犯者以  
殺論時晉公護將有異志欲寬政以取人心然闇於知人所委多  
不稱職既用法寬弛不足制姦子弟僚屬皆竊弄其權百姓愁怨  
控告無所武帝性甚明察自誅護後躬覽萬機雖骨肉無所縱捨  
用法嚴正中外肅然自魏晉相承死罪其重者妻子皆以補兵魏  
虜西涼之人沒入名爲隸戶魏武入關隸戶皆在東魏後齊因之

仍供廝役建德六年齊平後帝欲施輕典於新國乃詔凡諸雜戶  
悉放爲百姓自是無復雜戶其後又以齊之舊俗未改昏政賊盜  
姦宄頗乖憲章其年又爲刑書要制以督之其大抵持杖群盜一  
匹以上不持杖群盜五匹以上監臨主掌自盜二十匹以上盜及  
詐請官物三十匹以上正長隱五戶及丁以上及地頃以上皆死  
自餘依大律由是澆詐頗息焉宣帝性殘忍暴戾自在儲貳惡其  
叔父齊王憲及王軌宇文弼等及卽位並先誅戮由是內外不  
安俱懷危懼帝又恐失衆望乃行寬法以取衆心宣政元年八月  
詔制九條宣下州郡大象元年又下詔曰高祖所立刑書要制用  
法深重其一切除之然帝荒淫日甚惡聞其過誅殺無度疎斥大  
臣又數行肆赦爲姦者皆輕犯刑法政令不一下無適從於是又  
廣刑書要制而更峻其法謂之刑經聖制宿衛之官一日不直罪



至刖除逃亡者皆死而家口籍沒上書字誤者科其罪鞭杖皆百二十爲度名曰天杖其後又加至二百四十又作霹靂車以威婦人其決人罪云與杖者卽一百二十多打者卽二百四十帝旣酣飲過度嘗中飲有下士楊文祐白宮伯長孫覽求歌曰朝亦醉暮亦醉日日恒常醉政事日無次鄭譯奏之帝怒命賜杖二百四十而致死後更令中士皇甫猛歌猛歌又諷諫鄭譯又以奏之又賜猛杖一百二十是時下自公卿內及妃后咸加桎楚上下愁怨及帝不豫而內外離心各求苟免隋高祖爲相又行寬大之典刪略舊律作刑書要制旣成奏之靜帝下詔頒行諸有犯罪未科決者竝依制處斷

高祖旣受思禪開皇元年乃詔尚書左僕射渤海公高穎上柱國沛公鄭譯上柱國清河郡公楊素大理前少卿平源縣公常明刑

部侍郎保城縣公韓濬比部侍郎李諤兼考功侍郎柳雄亮等更定新律奏上之其刑名有五一日死刑二有絞有斬二曰流刑三有一千里五百里二千里應配者一千里居作二年一千五百里居作二年半二千里居作三年應住居作者三流俱役三年近流加杖一百一等加三十三曰徒刑五有一年一年半二年二年半三年四曰杖刑五自五十至千五百曰笞刑五自十至千五百而蠲除前代鞭刑及梟首轘裂之法其法徒之罪皆減從輕唯大逆謀反叛者父子兄弟皆斬家口沒官又置十惡之條多採後齊之制而頗有損益一曰謀反二曰謀大逆三曰謀叛四曰惡逆五曰不道六曰大不敬七曰不孝八曰不睦九曰不義十曰內亂犯十惡及故殺人獄成者雖會赦猶除名其在八議之科及官品第七以上犯罪皆例減一等其品第九已上犯者聽贖應贖者皆以



銅代絹贖銅一斤爲一負負十爲殿笞十者銅一斤加至杖百則  
十斤徒一年贖銅二十斤每等則加銅十斤三年則六十斤矣流  
一千里贖銅八十斤每等則加銅十斤二千里則百斤矣二死皆  
贖銅百二十斤犯私罪以官當徒者五品已上一官當徒二年九  
品已上一官當徒一年當流者三流周比徒三年若犯公罪者徒  
各加一年當流者各加一等其累徒過九年者流二千里定訖詔  
頒之曰帝王作法沿革不同取適于時故有損益夫絞以致斃斬  
則殊形除惡之體於斯已極梟首輟身義無所取不益懲肅之理  
徒表安忍之懷鞭之爲用殘剝膚體徹骨侵肌酷均變切雖云遠  
古之式事乖仁者之刑梟輟及鞭並令去也貴礪帶之書不當徒  
罰廣軒冕之蔭旁及諸親流役六年改爲五載刑徒五歲變從三  
祀其餘以輕代重化死爲生條目甚多備於簡策宜頒諸海內爲

時軌範雜格嚴科竝宜除削先施法令欲人無犯之心國有常刑  
誅而不怒之義措而不用庶或非遠萬方百辟知吾此懷自前代  
相承有司訊考皆以法外或有大棒束杖車輻鞵底壓踝杖枕  
之屬楚毒備至多所誣伏雖文致於法而每有枉濫莫能自理至  
是盡除苛慘之法訊囚不得過二百柳杖大小咸爲之程品行杖者  
不得易入帝又以律令初行人未知禁故犯法者衆又下吏承苛  
政之後務鍛鍊以致人罪乃詔申敕四方敦理辭訟有枉屈縣不  
理者令以次經郡及州省仍不理乃詣闕申訴有所未愜聽樞登  
聞鼓有司錄狀奏之帝又每季親錄囚徒常以秋分之前省閱諸  
州申奏罪狀三年因覽刑部奏斷獄數猶至萬條以爲律尚嚴密  
故人多陷罪又敕蘇威牛弘等更定新律除死罪八十一條流罪一  
百五十四條徒杖等千餘條定留唯五百條凡十二卷一曰名例



二曰衛禁三曰職制四曰戶婚五曰廩庫六曰擅興七曰賊盜八曰鬪訟九曰詐僞十曰雜律十一曰捕亡十二曰斷獄自是刑網簡要疎而不失於是置律博士弟子員斷決大獄皆先牒明法定其罪名然後依斷五年侍官慕容天遠糾都督田元昌請義倉事實而始平縣律生輔恩舞文陷天遠遂更反坐帝聞之乃下詔曰人命之重懸在律文刊定科條俾令易曉分官命職恒選循吏小大之獄理無疑舛而因襲往代別置律官報判之人推其爲首殺生之柄常委小人刑罰所以未清威福所以妄作爲政之失莫大於斯其大理律博士尚書刑部曹明法州縣律生竝可停廢自是諸曹決事皆令具寫律文斷之六年敕諸州長史已下行參軍已上竝令習律集京之日試其通不又詔免尉迴王謙司馬消難三道逆人家口之配沒者悉官酬贖使爲編戶因除孥戮相坐之法

又命諸州囚有處死不得馳驛行決高祖性猜忌素不悅學旣任智而獲大位因以文法自<sub>於</sub>明察臨下恒令左右覘視内外有小過失則加以重罪又患令史贓汙因私使人以錢帛遺之得犯立斬每於殿廷打人一日之中或至數四嘗怒問事揮楚不甚卽命斬之十年尚書左僕射高頴治書侍御史柳彧等諫以爲朝堂非殺人之所殿廷非決罰之地帝不納頴等乃盡詣朝堂請罪曰陛下子育群生務在去弊而百姓無知犯者不息致陛下決罰過嚴皆臣等不能有所裨益請自退屏以避賢路帝於是顧謂領左右都督田元曰吾杖重乎元曰重帝問其狀元舉手曰陛下杖大如指搯楚人三十者比常杖數百故多致死帝不懌乃令殿內去杖欲有決罰各付所由後楚州行參軍李君才上言帝寵高頴過甚上大怒命杖之而殿內無杖遂以馬鞭笞殺之自是殿內復置杖



未幾怒甚又於殿庭殺人兵部侍郎馮基固諫帝不從竟於殿庭  
行決帝亦尋悔宣慰馮基而怒群僚之不諫者十二年帝以用律  
者多致躑駁罪同論異詔諸州死罪不得便決悉移大理案覆事  
盡然後上省奏裁十三年改徒及流竝爲配防十五年制死罪者  
三奏而後決十六年有司奏合川倉粟少七千石命斛律季卿鞫  
問其事以爲主典所竊復令季卿馳驛斬之沒其家爲奴婢鬻粟  
以填之是後盜邊糧者一升已上皆死家口沒官上又以典吏久  
居其職肆情爲姦諸州縣佐史三年一代經任者不得重居之十  
七年詔又以所在官人不相敬憚多自寬縱事難克舉諸有殿失  
雖備科條或據律乃輕論情則重不卽決罪無以懲肅其諸司屬  
官若有愆犯聽於律外斟酌決杖於是上下相驅迫行桎楚以殘  
暴爲幹能以守法爲懦弱是時帝意每尚慘急而姦回不止京市

白日公行掣盜人間強盜亦往往而有帝患之問群臣斷禁之法  
楊素等未及言帝曰朕知之矣詔有能糾告者沒賊家產業以賞糾  
人時月之間內外寧息其後無賴之徒候富人子弟出路者而故  
遺物於其前偶拾取則擒以送官而取其賞大抵被陷者甚衆帝  
知之乃命盜一錢已上皆棄市行旅皆晏起晚宿天下慄慄焉此  
後又定制行署取一錢已上聞見不告言者坐至死自此四人共  
盜一椽桶三人同竊一瓜事發卽時行決有數人劫執事而謂之  
曰吾豈求財者邪但爲枉人來耳而爲我奏至自古以來體國  
立法未有盜一錢而死也而不爲我以聞吾更而屬無類矣帝  
聞之爲停盜取一錢棄市之法帝嘗發怒六月棒殺人大理少卿  
趙綽固爭曰季夏之月天地成長庶類不可以此時誅殺帝報曰  
六月雖曰生長必時必有雷霆天道旣於炎陽之時震其威怒我



則天而行有何不可遂殺之大理掌固來曠上封事言大理官司  
恩寬帝以曠爲忠直遣每且於五品行中參見曠又告少卿趙綽  
濫免徒囚帝使信臣推驗初無阿曲帝又怒曠命斬之綽因固爭  
以爲曠不合死帝乃拂衣入閣綽又矯言臣更不理曠自有他事  
未及奏聞帝命引入閣綽再拜請曰臣有死罪三臣爲大理少卿  
不能制馭掌固使曠觸挂天刑死罪一也因不合死而臣不能死  
爭死罪二也臣本無他事而妄言求入死罪三也帝解顏會獻皇  
后在坐帝賜綽二金盃酒飲訖并以盃賜之曠因免死配徒廣州  
帝以年齡晚暮尤崇尚佛道又素信鬼神二十年詔沙門道士壤  
佛像天尊百姓壞岳瀆神像皆以惡逆論帝猜忌二朝臣察用法  
尤峻御史監帥於元正日不効武官衣劍之不齊者或以白帝帝  
謂之曰爾爲御史何縱捨白宙命殺之諫議大夫毛思祖諫又殺

之左領軍府長史考校不平將作寺丞以諫麥麴遲晚武庫令以  
署庭荒蕪獨孤師以受蕃客鸚鵡帝察知竝親臨斬決仁壽中用  
法益峻帝旣喜怒不恒不復依準科律時楊素正被委任素又稟  
性高下公卿股慄不敢措言素於鴻臚少卿陳延不平經蕃客館  
庭中有馬屎又庶僕擅上檮蒲旋以白帝帝大怒曰主客令不灑  
掃庭內掌國以私戲汙敗官擅罪狀何以加此皆於西市棒殺而  
榜棰陳延殆至於斃大理寺丞楊遠劉子通等性愛深文每隨牙  
奏獄能承順帝旨帝大悅竝遣於殿庭三品行中供奉每有詔獄  
專使至之候帝所不快則案以重抵無殊罪而死者不可勝原遠  
又能以楊素每於塗中接候而以囚名白之皆隨素所爲輕重其  
臨終赴市者莫不塗中呼枉仰天而哭越公素侮弄朝權帝亦不  
之能悉煬帝卽位以高祖禁網深刻又敕修律令除十惡之條時



升稱皆小舊二倍其贖銅亦加二倍爲差杖百則三十斤矣徒一  
年者六十斤每等加三十斤爲差三年則一百八十斤矣流無異  
等贖二百四十斤二死同贖三百六十斤其實不異開皇舊制豈  
門子弟不得居宿衛近侍之官先是蕭巖以叛誅崔君綽坐連庶  
人勇事家口籍沒巖以中宮故君綽緣女入宮愛幸帝乃下詔革  
前制曰罪不及嗣旣弘至孝之道恩由義斷以勸事君之節故羊  
鮒從戮彌見叔向之誠季布立勳無預丁公之禍用能樹聲往代  
貽範將來朕虛已爲政思遵舊典推心待物每從寬政六位成象  
美厥含弘一肯掩德甚非謂也諸犯罪被戮之門基已下親仍令  
合仕聽預宿衛近侍之官三年新律成凡五百條爲十八篇詔施  
行之謂之大業律一曰名例二曰衛宮三曰違制四曰請求五曰  
戶六曰婚七曰擅興八曰告劾九曰賊十曰盜十一曰鬪十二曰

捕亡十三曰倉庫十四曰廢牧十五曰鬪市十六曰雜十七曰詐  
僞十八曰斷獄其五刑之內降從輕典者二百餘條其枷杖決罰  
訊囚之制並輕於舊是時百姓久厭嚴刻喜於刑寬後帝乃外征  
四夷內窮嗜慾兵革歲動賦斂滋繁有司皆臨時迫脅苟求濟事  
憲章遐棄賄賂公行窮人無告聚爲盜賊帝乃更立嚴刑敕天下  
竊盜已上罪無輕重不待聞奏皆斬百姓轉相群聚攻剽城邑誅  
罰不能禁帝以盜賊不息乃益肆淫刑九年又詔爲盜者籍沒其  
家自是群賊大起郡縣官人又各專威福生殺任情矣及楊玄感  
反帝誅之罪及九族其尤重者行轅裂臬首之刑或磔而射之命  
公卿已下齧噉其肉百姓怨嗟天下大潰及恭帝卽位獄訟有歸  
焉



隋書卷二十五 刑法志第二十終

刑部

隋書卷二十六

刑部

志第二十一 太尉楊州都督監國更上 禮 國公臣長孫無忌等奉敕撰

百官上

易曰天尊地卑乾坤定矣卑高既陳貴賤位矣是以聖人法乾坤以作則因卑高以垂教設官分職錫珪昨土由近以制遠自中以統外內則公卿大夫士外則公侯伯子男咸所以協和萬邦平章百姓允釐庶績式敘彝倫其由來尚矣然古今異制文質殊途或以龍表官或以雲紀職放勛即分命四子重華乃爰置九官夏倍於虞殷倍於夏周監二代沿革不同其道既文置官彌廣逮於戰國戎馬交馳雖時有變革然猶承周制秦始皇廢先王之典焚百家之言創立朝儀事不師古始罷封侯之制立郡縣之官太尉主五兵丞相總百揆又置御史大夫以貳丞相自餘眾職各有司存

及古制一



漢高祖除暴寧亂輕刑約法而職官之制因於嬴氏其間同異抑  
亦可知光武中興聿遵前緒唯廢丞相與御史大夫而以三公綜  
理衆務洎於叔世事歸臺閣論道之官備員而已魏晉繼及大抵  
略同爰及宋齊亦無改作梁武受終多循齊舊然而定諸卿之位  
各配四時置戎秩之官百有餘號陳氏繼梁不失舊物高齊創業  
亦遵後魏臺省位號與江左稍殊所有節文備詳於志有周創據  
關右日不暇給洎乎克清江漢爰議憲章酌豐鎬之遺文置六官  
以綜務詳其典制有可稱焉高祖踐極自度伊始復廢周官還依  
漢魏唯以中書爲內史侍中爲納言自餘庶僚頗有損益煬帝嗣  
位意存稽古建官分職率由舊章大業三年始行新令於時三川  
定鼎萬國朝宗衣冠文物足爲壯觀既以人從欲待下若讐號  
令日改官名月易尋而南征不復朝廷抽遷圖籍注記多從散逸

今之存錄者不能詳備焉

梁武受命之初官班多同宋齊之舊丞相太宰太傅太保大將  
軍大司馬太尉司徒司空開府儀同三司等官諸公及位從公開  
府者置官屬有長史司馬諮議參軍掾屬從事中郎記室主簿列  
曹參軍行參軍舍人等官其司徒則有左右二長史又增置左西  
掾一人自餘僚佐同於二府有公則置無則省而司徒無公唯省  
舍人餘官常置開府儀同三司位次三公諸將軍左右光祿大夫  
優者則加之同三公置官屬  
特進舊位從公武帝以鄧禹列侯就第特進奉朝請是特引見之  
稱無官定體於是革之

尚書省置令左右僕射各一人又置吏部祠部度支左戶都官五  
兵等六尚書左右丞各一人吏部剛定三公比部祠部儀曹虞曹



主客度支殿中金部倉部左戶駕部起部屯田都官水部庫部功  
論中兵外兵騎兵等郎二十三人令史百二十人書令史百三十  
人

尚書掌出納王命敷奏萬機令總統之僕射副令又與尚書分領  
諸曹令闕則左僕射爲主其祠部尚書多不置以右僕射主之若  
左右僕射竝闕則置尚書僕射以掌左事置祠部尚書以掌右事  
然則尚書僕射祠部尚書不恒置矣又有起部尚書營宗廟宮室  
則權置之事畢則省以其事分屬都官左戶二尚書左右丞各一  
人佐令僕射知省事左掌臺內分職儀禁令報人章督錄近道文  
書章表奏事糾諸不法右掌臺內藏及廬舍凡諸器用之物督錄  
遠道文書章表奏事凡諸尚書文書詣中書省者密事皆以挈囊  
盛之封以左丞印自晉以後八座及中多不奏事天監元年

曰自禮闈陵替歷茲永久卽署備員無取職事糠粃文案貴尚虛  
閑空有趨墀之名了無握蘭之實曹郎可依昔奏事自是始奏事  
矣三年置侍郎視通直郎其郎中在職勤能滿二歲者轉之又有  
五都令史與左右丞共知所司舊用人常輕九年詔曰尚書五都  
職參政要非但總領衆局亦乃方軌二丞頃雖求才未臻妙簡可  
革用士流每盡時彥庶同持領秉此群目於是以前令史視奉朝  
請其年以太學博士劉納兼殿中都司空法曹參軍劉顯兼吏部  
都太學博士孔虔孫兼金部都司空法曹參軍蕭軌兼左戶都宣  
毅墨曹參軍王顥兼中兵都五人竝以才地兼美首膺茲選矣駕  
部又別領車府署庫部領南北武庫二署令丞  
門下省置侍中給事黃門侍郎各四人掌侍從左右擯相威儀盡  
規獻納糾正違闕監合嘗御藥封璽書侍郎中高功者在職一年



詔加侍中祭酒與侍郎高功者一人對掌禁令公車太官太醫等  
令驛驪殿丞

集書省置散騎常侍通直散騎常侍各四人員外散騎常侍無員  
散騎侍郎通直郎各四人又有員外散騎侍郎給事中奉朝請常  
侍侍郎掌侍從左右獻納得失省諸奏聞文書意異者隨事為駁  
集錄比詔比璽為諸優文策文平處諸文章詩頌常侍高功者一  
人為祭酒與侍郎高功者一人對掌禁令糾諸逋違

駙馬奉車車騎三都尉並無員駙馬以加尚公主者無班秩  
散騎常侍通直散騎常侍員外散騎常侍舊並為顯職與侍中通  
官宋代以來或輕或雜其官漸替天監六年革選詔曰在昔晉初  
抑惟盛化常侍侍中並奏帷幄員外常侍特為清顯陸始名公之  
胤位居納言曲蒙優禮方有斯授可分門下二局委散騎常侍尚

書案奏分曹入集書通直常侍本為顯爵員外之選宜參舊准人  
數依正員格自是散騎視侍中通直視中丞員外視黃門郎  
中書省置監令各一人掌出內帝命侍郎四人功高者一人主省  
內事又有通事舍人主事令史等員及置令史以承其事通事舍  
人舊入直閣內梁用人殊重簡以才能不限資地多以他官兼領  
其後除通事直日中書舍人

祕書省置監丞各一人郎四人掌國之典籍圖書著作郎一人佐  
郎八人掌國史集注起居著作郎謂之大著作梁初周捨裴子野  
皆以他官領之又有撰史學士亦知史書佐郎為起家之選

御史臺梁國初建置大夫天監元年復置中丞置一人掌督司百  
寮皇太子已下其在宮門行馬內違法者皆糾彈之雖在行馬外  
而監司不糾亦得奏之專道而行逢尚書丞郎亦得停駐其尚書



令僕御史中丞各給威儀十人其八人武冠絳鞬執青儀囊在前  
囊題云宜官吉以受辭訴一人緇衣執鞭杖依列行七人唱呼入  
殿引嚶至階一人執儀囊不嚶屬官治書侍御史二人掌舉劾官  
品第六已下分統侍御史侍御史九人居曹掌知其事糾察不法  
殿中御史四人掌殿中禁衛內又有符節令史員  
謁者臺僕射一人掌朝覲賓饗之事屬官謁者十人掌奉詔出使  
拜假朝會擯贊高功者一人為假史掌差次謁者

諸卿梁初猶依宋齊皆無卿名天監七年以太常為太常卿加置  
宗正卿以大司農為司農卿三卿是為春卿加置太府卿以少府  
為少府卿加置太僕卿三卿是為夏卿以衛尉為衛尉卿廷尉為  
廷尉卿將作大匠為大匠卿三卿是為秋卿以光祿勳為光祿卿  
大鴻臚為鴻臚卿都水使者為大舟卿三卿是為冬卿凡十二卿

皆置丞及功曹主簿而太常視金紫光祿大夫統明堂二廟太史  
太祝廩犧太樂鼓吹乘黃北館典客館等令丞及陵監國學等又  
置協律校尉總章校尉監掌故樂正之屬以掌樂事太樂又有清  
商署丞太史別有靈臺丞詔以為陵監之名不出前誥且宗廟憲  
章既備典禮園寢職司理不容異諸正陵先立監者改為令於是  
陵置令矣

國學有祭酒一人博士二人助教十人大學博士八人又有限外  
博士員天監四年置五經博士各一人舊國子學生限以貴賤帝  
欲招來後進五館生皆引寒門雋才不限人數大同七年國子祭  
酒到漑等又表立正言博士一人位視國子博士置助教二人  
宗正卿位視列曹尚書王皇室外戚之籍以宗室為之  
司農卿位視散騎常侍主農功倉廩統太倉導官籍田上林令又



管樂遊北以丞左右中部三倉丞菟庫菽庫若庫丞湖西諸屯王  
天監九年又置勸農謁者視殿中御史

太府卿位視宗正掌金帛府帑統左右藏令止庫丞掌太倉南北  
市令關津亦皆屬焉

少府卿位視尚書左丞置材官將軍左中右尚方甄官平水署南  
塘邸稅庫東西治中黃細作炭庫紙官柴署等令丞

太僕卿位視黃門侍郎統南馬牧左右牧龍殿內外廄丞又有弘  
訓太僕亦置屬官

衛尉卿位視侍中掌宮門屯兵卿每月丞每旬行宮徼糾察不法  
統武庫令公車司馬令又有弘訓衛尉亦置屬官

廷尉卿梁國初建曰大理天監元年復改爲廷尉有正監平二人  
元會廷尉三官與建康三官皆法冠玄衣朝服以監東西中華門

手執方木長三尺方一寸謂之執方四年置胄子律博士位視員

外郎

大匠卿位視太僕掌土木之工統左右校諸署

光祿卿位視太子中庶子掌宮殿門戶統守宮黃門華林園暴室  
等令又有左右光祿金紫光祿太中中散等大夫竝無員以養老

疾

鴻臚卿位視尚書左丞掌導護贊拜

大舟卿梁初爲都水臺使者一人參軍事二人河堤謁者八人七  
年改焉位視中書郎列卿之最末者也主舟航堤渚

大長秋主諸宦者以司宮闈之職統黃門中署奚官暴室華林等  
署領軍護軍左右衛驍騎游騎等六將軍是爲六軍又有中領中

護資輕於領護又左右前後四將軍左右中郎將屯騎步騎越騎



長水射聲等五營校尉武賁冗從羽林三將軍積射強弩二軍殿中將軍武騎之職皆以分司丹禁侍衛左右天監六年置左右驍騎左右游擊將軍位視二率改舊驍騎曰雲騎游擊曰游騎降左右驍游一階又置朱衣直閣將軍以經爲方牧者爲之其以左右驍游帶領者量給儀從

太子太傅一人位視尚書令少傅一人位視左僕射天監初又置東宮常侍皆散騎常侍爲之

詹事位視中護軍任總宮朝二傅及詹事各置丞功曹主簿五官家令率更令僕各一人家令自宋齊已來清流者不爲之天監六年帝以三卿陵替乃詔革選家令視通直常侍率更僕視黃門三等皆置丞中大通三年以昭明太子妃居金華宮又置金華家令左右衛率各一人位視御史中丞各有丞左率領果毅統遠立忠

建寧陵鋒夷冠祚德等七營右率領崇榮永吉崇和細射等四營二率各置殿中將軍十人員外將軍十人正員司馬四人又有員外司馬督官其屯騎步兵翊軍三校尉各一人謂之三校旅賁中郎將冗從僕射各一人謂之二將左右積弩將軍各一人門大夫一人視謁者僕射

中庶子四人功高者一人爲祭酒行則負璽前後部護駕

中舍人四人功高者一人與中庶子祭酒共掌其坊之禁令又有通事守舍人典事守舍人典法守舍人員

庶子四人掌侍從左右獻納得失高功者一人與高功舍人共掌其坊之禁令

舍人十六人掌文記通事舍人二人視南臺御史多以餘官兼職典經局洗馬八人位視通直郎置典經守舍人典事守舍人員又



有外監殿局內監殿局導客局齋內局主璽主衣扶持等局門局  
錫庫局內殿局中藥藏局食官局外殿局車殿局等各置有司以  
承其事

皇弟皇子府置師長史司馬從事中郎諮議參軍及掾屬中錄事  
中記室中直兵等參軍功曹史錄事記室中兵等參軍文學主簿  
正參軍行參軍長兼行參軍等員嗣王府則減皇弟皇子府師友  
文學長兼行參軍蕃王府則又減嗣王從事中郎諮議參軍掾屬  
錄事記室中兵參軍等員自此以下則並不登二品

王國置郎中令將軍常侍官又置典祠令廟長陵長典醫丞典府  
丞典書令學官令食官長中尉侍郎執事司馬謁者典衛令  
舍人中大夫大農等官嗣王國則惟置郎中令中尉常侍大農等  
員蕃王則無常侍自此以下並不登二品

諸王皆假金獸符第一至第五左竹使符第一至第十左諸公僕  
皆假銅獸符竹使符第一至第五名山大澤不以封鹽鐵金銀銅  
錫及竹園別都宮室園圃皆不以屬國

諸王言曰令境內稱之曰殿下公侯封郡縣者言曰教境內稱之  
曰第下自稱皆曰寡人相以下公文上事皆詣典書世子王國其  
文書表疏儀式如臣而不稱臣文書下群官皆言告諸王公侯國  
官皆稱臣上於天朝皆稱陪臣若所陳皆曰上疏其公文曰言事

五等諸公位視三公班次之開國諸侯位視孤卿重號將軍光祿  
大夫班次之開國諸伯位視九卿班次之開國諸子位視二千石  
班次之開國諸男位視比二千石班次之公已下各置相典祠典  
書令典衛長一人而伯子典書謂之長典衛謂之丞男典祠謂之  
長典書謂之丞無典衛諸公已下臺為選置相掌知百姓事典祠



已下自選補上諸列侯食邑千戶已上置家丞庶子員不滿千戶則但置庶子員

州刺史二千石受拜之明日辭宮廟而行州置別駕治中從事各一人主簿西曹議曹從事祭酒從事部傳從事文學從事各因其州之大小而置員郡置太守置丞國曰內史郡丞三萬戶以上置佐一人

縣爲國曰相大縣爲令小縣爲長皆置丞尉郡縣置吏亦各准州法以大小而制員郡縣吏有書僮有武吏有醫有迎新送故等員亦各因其大小而置焉

建康舊置獄丞一人天監元年詔依廷尉之官置正平監革選士流務使任職又令三官更直一日分受罪繫事無小大悉與令籌若有大事共詳三人具辨脫有同異各立議以聞尚書水部郎表

季然議曹郎孔休源竝爲之位視給事中

天監初武帝命尚書刪定郎濟陽蔡法度定令爲九品秩定帝於品下注一品秩爲萬石第二第三爲中二千石第四第五爲二千石至七年革選徐勉爲吏部尚書定爲十八班以班多者爲貴同班者則以居下者爲劣

丞相太宰太傅太保大司馬大將軍太尉司徒司空爲十八班諸將軍開府儀同三司左右光祿開府儀同三司爲十七班

尚書令太子太傅左右光祿大夫爲十六班

尚書左僕射太子少傅尚書僕射右僕射中書監特進領護軍將軍爲十五班

中領護軍吏部尚書太子詹事金紫光祿大夫太常卿爲十四班

中書令列曹尚書國子祭酒宗正太府卿光祿大夫爲十三班



侍中散騎常侍左右衛將軍司徒左長史衛尉卿為十二班

御史中丞尚書吏部郎祕書監通直散騎常侍太子左右二衛率

左右驍騎左右游擊太中大夫皇弟皇子師司農少府廷尉卿太

子中庶子光祿卿為十一班

給事黃門侍郎員外散騎常侍皇弟皇子府長史太僕大匠卿太

子家令率更令僕揚州別駕中散大夫司徒右長史雲騎游騎皇

弟皇子府司馬朱衣直閣將軍為十班

尚書左丞鴻臚卿中書侍郎國子博士太子庶子揚州中從事皇

弟皇子公府從事中郎太舟卿大長秋皇弟皇子府諮議嗣王府

長史前左右後四軍嗣王府司馬庶姓公府長史司馬為九班

祕書丞太子中舍人司徒左西掾司徒屬皇弟皇子友散騎侍郎

尚書右丞南徐州別駕皇弟皇子公府掾屬皇弟皇子單為二衛

司馬嗣王庶姓公府從事中郎左右中郎將嗣王庶姓公府諮議

皇弟皇子之庶子府長史司馬蕃王府長史司馬庶姓持節府長

史司馬為八班

五校東宮三校皇弟皇子之庶子府中錄事中記室中直兵參軍

南徐州中從事皇弟皇子之庶子府蕃王府諮議為七班

太子洗馬通直散騎侍郎司徒主簿尚書侍郎著作郎皇弟皇子

府功曹史五經博士皇弟皇子府錄事記室中兵參軍皇弟皇子

荆江雍郢南兗五州別駕領護軍長史司馬嗣王庶姓公府掾屬

南臺治書侍御史廷尉三官謁者僕射太子門大夫嗣王庶姓公

府中錄事中記室中直兵參軍庶姓府諮議為六班

尚書郎中皇弟皇子文學及府主簿太子太傅少傅丞皇弟皇子

湘豫司益廣青衡七州別駕皇弟皇子荆江雍郢南兗五州中從

事



事嗣王庶姓荆江雍郢南兗五州別駕太常丞皇弟皇子國郎中  
令三將東宮二將嗣王府功曹史庶姓公府錄事記室中兵參軍皇  
弟皇子之庶子府蕃王府中錄事中記室中直兵參軍爲五班  
給事中皇弟皇子府正參軍中書舍人建康三官皇弟皇子北徐  
北兗梁交南梁五州別駕皇弟皇子湘豫司益廣青衡七州別駕  
中從事嗣王庶姓湘豫司益廣青衡七州別駕嗣王庶姓荆江雍  
郢南兗五州中從事宗正大府衛尉司農少府廷尉太子詹事等  
丞積射彊弩將軍太子左右積弩將軍皇弟皇子國大農嗣王國  
郎中令嗣王庶姓公府正簿皇弟皇子之庶子府蕃王府功曹史  
皇弟皇子之庶子府蕃王府錄事記室中兵參軍爲四班  
太子舍人司徒祭酒皇弟皇子公府祭酒員外散騎侍郎皇弟皇  
子府行參軍太子太傅少傅五官功曹正簿二衛司馬公車令冑

子律博士皇弟皇子越桂寧霍四州別駕皇弟皇子北徐北兗梁  
交南梁五州中從事嗣王庶姓北徐北兗梁交南梁五州別駕湘  
豫司益廣青衡七州中從事嗣王庶姓公府正參軍皇弟皇子之  
庶子府蕃王府曹正簿武衛將軍光祿丞皇弟皇子國中尉太僕  
大匠丞嗣王國大農蕃王國郎中令庶姓持節府中錄事中記室  
中直兵參軍北館令爲三班

祕書郎著作佐郎楊南徐州正簿嗣王庶姓公府祭酒皇弟皇子  
單爲領護詹事二衛等五官功曹正簿太學博士皇弟皇子國常  
侍奉朝請國子助教皇弟皇子越桂寧霍四州中從事皇弟皇子  
荆江雍郢南兗五州正簿嗣王庶姓越桂寧霍四州別駕嗣王庶  
姓北徐北兗梁交南梁五州中從事鴻臚丞尚書五都令史武騎  
常侍材官將軍明堂二廟帝陵令嗣王府庶姓公府行參軍皇弟



皇子之庶子府正參軍蕃王國太農庶姓持節府錄事記室中兵參軍庶姓持節府功曹史爲二班

揚南徐州西曹祭酒從事皇子國侍郎嗣王國常侍揚南徐州議曹從事東宮通事舍人南臺侍御史太舟丞二衛殿中將軍太子二率殿中將軍皇子之庶子府蕃王府行參軍蕃王國中尉皇子湘豫司益廣青衡七州主簿皇子荆雍郢南兗四州西曹祭酒議曹從事皇子江州西曹從事祭酒議曹祭酒部傳從事嗣王庶姓越桂寧霍四州中從事嗣王庶姓荆江雍郢南兗五州主簿庶姓持節府主簿汝陰巴陵二國郎中令太官太樂太市太史太醫太祝東西左右尚方南北武庫車府等令爲一班

軍嗣王國侍郎蕃王國常侍揚南徐州文學從事殿中御史庶姓持節府除正參軍太子家令丞二衛殿中員外將軍太子二率殿中員外將軍鎮蠻安遠護軍度支校尉等司馬皇子北徐北兗梁交南梁五州主簿皇子湘豫司益廣青衡七州西曹祭酒議曹從事皇子荆雍郢三州從事史江州議曹從事南兗州文學從事嗣王庶姓湘豫司益廣青衡七州主簿嗣王庶姓荆雍郢南兗四州西曹祭酒議曹從事嗣王庶姓江州西曹從事祭酒部傳從事勸農謁者汝陰巴陵二國太農都公國郎中令爲七班

皇子國典書令嗣王國三軍蕃王國侍郎領護詹事五官功曹皇子府參軍督護嗣王府長兼參軍庶姓公府長兼參軍庶姓持節府板正參軍皇子越桂寧霍四州主簿皇子北徐北兗梁交南梁五州西曹祭酒議曹從事嗣王庶姓北徐北



兗梁交南梁五州主簿嗣王庶姓湘豫司益廣青衡七州西曹祭  
酒議曹從事皇弟皇子豫司益廣青五州文學從事湘衡二州從  
事嗣王庶姓荆霍郢三州從事史江州議曹從事南兗州文學從  
事汝陰巴陵二王國中尉皇弟皇子之庶子縣侯國郎中令郡公  
國郎中令郡公國大農縣公國郎中令爲六班  
皇弟皇子國三令嗣王國典書令蕃王國三軍皇弟皇子公府東  
曹督護嗣王府庶姓公府參軍督護皇弟皇子之庶子長兼參軍  
蕃王府長兼參軍二衛正員司馬督太子二率正員司馬督領護  
主簿詹事主簿二衛功曹太常五官功曹石頭戍軍功曹庶姓持  
節府行參軍皇弟皇子越桂寧霍四州西曹祭酒議曹從事皇弟  
皇子北徐北兗梁交南梁五州文學從事嗣王庶姓越桂寧霍四  
州主簿嗣王庶姓北徐北兗梁交南梁五州西曹祭酒議曹從事

嗣王庶姓豫司益廣青五州文學從事湘衡二州從事汝陰巴陵二王  
國常侍郡公國中尉縣侯國郎中令皇弟皇子府功曹督護爲五班  
嗣王國三令蕃王國典書令嗣王府功曹督護庶姓公府東曹督  
護皇弟皇子之庶子府參軍督護蕃王府參軍督護二衛員外司  
馬督太子二率員外司馬督二衛主簿太常主簿宗正等十一卿  
五官功曹石頭戍軍主簿庶姓持節府板行參軍皇弟皇子越桂  
寧霍四州文學從事嗣王庶姓越桂寧霍四州西曹祭酒議曹從  
事嗣王庶姓北徐北兗梁交南梁五州文學從事汝陰巴陵二王  
國侍郎縣公國中尉爲四班  
蕃王國三令皇弟皇子之庶子府蕃王府功曹督護宗正等十一  
卿主簿庶姓持節府長兼參軍嗣王庶姓越桂寧霍四州文學從  
事郡公國侍郎爲三班



庶姓持節府參軍督護公陰巴陵二王國典書令縣公國侍郎為一班  
庶姓持節府功曹督護公陰巴陵二王國三令郡公國典書令為一班  
又著作正令史集書正令史尚書度支三公正令史函典書殿中  
外監齊東堂監尚書都官左降正令史諸州鎮監石頭城監琅邪  
城監東宮外監殿中守舍人齊監東宮典經守舍人上庫令太社  
令細作令導官令平水令太官市署丞正廚丞酒庫丞柴署丞太  
樂庫丞別局校丞清商丞太史丞太醫二丞中藥藏丞東冶小庫  
等三丞作堂金銀局丞木局丞北武庫二丞南武庫二丞東宮食  
官丞上林丞湖西塲屯丞菱箬庫丞紋絹篔席丞國子典學材官  
司馬宜陽等諸門候東宮導客守舍人運署謁者都水左右二裝  
五城謁者石城宣城陽新屯謁者南康建安晉安伐船謁者晉安  
練葛屯王為三品蘊位又門下集書主事通正令史中書正令史

尚書正令史尚書監籍正令史都正令史殿中內監題閣監婚局  
監東宮門下通事守舍人東宮典書守舍人東宮內監殿中守舍  
人題閣監乘黃令右藏令籍田令廩犧令梅根諸治令典客館令  
太官四丞庫丞太樂令東冶大庫丞左尚方五丞右尚方四丞東  
宮衛庫丞司農左右中部倉丞廷尉律博士公府舍人諸州別署  
監山陰獄丞為三品勳位其州二十三並列其高下選擬略視內  
職郡守及丞各為十班縣制七班用人各擬內職云

又詔以將軍之名高卑舛雜命更加釐定於是有所奏置二百二十  
五號將軍以鎮衛驃騎車騎為二十四班內外通用四征東南西北止施外四中軍衛撫護止施內

為二十三班八鎮東南西北止施在外為二十二班八安東南西北止施在外為二

十一班四平東南西北止施在內為二十班凡三十五號為一品是為重

號將軍忠武軍師為十九班武臣爪牙龍騎雲麾為十八班代舊前後左右



四將鎮兵翊師宣慰宣毅為十七班代舊四十號為一品智威仁威勇  
威信威嚴威為十六班代舊征虜智武仁武勇武信武嚴武為十五班  
代舊冠軍十號為一品所謂五德將軍者也輕車征遠鎮朔武旅貞毅為  
十四班代舊輔國凡將軍加大者唯至貞毅而已通進一階優者方得比加位從公凡督府置  
長史司馬諮議諸曹有錄事記室等十八曹天監七年更置中錄事中記室中直兵參  
軍各一人寧遠明威振遠電耀威耀為十三班代舊十號為一品武威武騎  
武猛壯武威武為十二班電威馳銳追鋒羽騎突騎為十一班十  
號為一品折衝冠武和戎安壘猛烈為十班掃狄雄信掃虜武銳  
椎鋒為九班十號為一品略遠貞威決勝開遠光野為八班厲鋒  
輕銳討狄蕩虜蕩夷為七班十號為一品武毅鐵騎樓船宜猛樹  
功為六班克狄平虜討夷平狄威戎為五班十號為一品伏波雄  
戰長劔衝冠雕騎為四班飲飛安夷克戎緩狄威虜為三班十號為  
一品前鋒武毅開邊招遠金威為二班綏虜蕩寇殄虜橫野馳射

為一班十號為一品凡十品二十四班亦以班多為貴其制品十  
取其盈數班二十四以法氣序制縛悉以大號居後以為選法自  
小遷大也前史所記以位得從公故將軍之名次于台槐之下至  
是備其班品敘於百司之外其不登二品應須軍號者有牙門代舊  
期門代舊為八班候騎代舊熊渠代舊為七班中堅代舊典戎代舊為  
六班戈船代舊繡衣代舊為五班執訊代舊行陣代舊為四班鷹揚為  
三班陵江為二班偏將軍裨將軍為一班凡十四號別為八班以  
象八風所施甚輕又有武安鎮遠雄義擬車為二十四班四撫東南西北  
征為二十三班四寧東南西北為二十二班四威東南西北為二十一  
班四綏東南西北為二十班凡十九號為一品安遠安邊擬忠武為十  
九班輔義安沙衛海撫河擬武臣為十八班平遠撫朔寧沙航海擬鎮  
四為十七班凡十號為一品翊海朔野拓遠威河龍幕擬智威為十



六班威隴安漠綏邊寧寇梯山擬知武為十五班凡十號為一品寧  
境綏河明信明義威漠擬輕車為十四班安隴向義宣節振朔候律  
擬寧遠為十三班凡十號為一品平寇定遠陵海寧隴振漠擬武威為  
等五號十二班馳義橫朔明節執信懷德擬雷威為十一班凡十號為一品  
撫邊定隴綏關立信奉義擬折衝為十班綏隴寧邊定朔立節懷威  
擬掃狄為九班凡十號為一品懷關靜朔掃寇寧河安朔擬略遠為八  
等五號班揚化超隴執義來化度嶂擬厲鋒為七班凡十號為一品平河振  
隴雄邊橫沙寧關擬武毅為六班懷信宣義弘節浮遼鑿空擬克狄為  
五班凡十號為一品扞海款塞歸義陵河明信擬伏波為四班奉忠  
守義弘信仰化立義擬伏飛為三班凡十號為一品綏方奉正承化  
浮海度河擬光鋒為二班懷義奉信歸誠懷澤伏羲擬虜為一班凡  
十號為一品大凡一百九號將軍亦為十品二十四班正施於外

國及大通三年有司奏曰天監七年改定將軍之名有因有革晉  
通六年又置百號將軍更加刊正雜號之中微有移異大通三年  
奏移寧遠班中明威將軍進輕車班中以輕車班中征遠度入寧  
遠班中又置安遠將軍代貞武宣遠代明烈其戎夷之號亦加附  
擬選序則依此承用遂以定制轉則進一班黜則退一班班即階  
也同班以優劣為前後有鎮衛驃騎車騎同班四中四征同班八  
鎮同班八安同班四平四翊同班忠武軍師同班武臣爪牙龍騎  
雲麾冠軍同班鎮兵翊師宣惠宣毅四將軍東南西北四中郎將  
同班智威仁威勇威信威嚴威同班智武仁武勇武信武嚴武同  
班謂為五德將軍輕車鎮朔武旅貞毅明威同班寧遠安遠征遠  
振遠宣遠同班威雄威猛威烈威振威信威勝威略威風威力威  
光同班武猛武略武勝武力武毅武健武烈武威武銳武勇同班



猛毅猛烈猛威猛銳猛震猛進猛智猛  
勇壯烈壯猛壯銳壯盛壯毅壯志壯意壯力同班驍雄驍桀驍猛  
驍烈驍武驍勇驍銳驍名驍勝驍迅同班雄猛雄威雄明雄烈雄  
信雄武雄勇雄毅雄壯雄健同班忠勇忠烈忠忠猛忠銳忠壯忠毅  
忠捍忠信忠義忠勝同班明智明略明遠明勇明烈明威明勝明  
進明銳明毅同班光烈光明光英光遠光勝光銳光命光勇光戎  
光野同班颯勇颯猛颯烈颯銳颯奇颯決颯起颯略颯勝颯出同  
班龍驤武視雲旗風烈電威雷音馳銳追銳羽騎突騎同班折衝  
冠武和戎安壘超猛英果掃虜掃狄武銳椎鋒同班開遠略遠貞  
威決勝清野堅銳輕銳拔山雲勇振旅同班超武鐵騎樓船宣猛  
樹功克狄平虜稜威昭威威戎同班伏波雄戟長劔衝冠雕騎伏  
飛勇騎破敵克敵威虜同班前鋒武毅開邊招遠金威破陣蕩寇

珍虜橫野馳射同班牙門期門同班候騎熊渠同班中堅典戎同  
班執訊行陣同班伏武懷奇同班偏裨將軍同班凡二百四十號  
為四十四班又雍州置寧蠻校尉廣州置平越中郎將北涼南秦  
置西戎校尉南秦梁州置平戎校尉寧州置鎮蠻校尉西陽南新  
蔡晉熙廬江等郡置鎮蠻護軍武陵郡置安遠護軍巴陵郡置度  
支校尉皆立府隨府主號輕重而不為定其將軍施於外國者雄  
義鎮遠武安同班擬鎮衛等三號四撫同班擬四征四威同班擬  
四安四綏同班擬四平安遠安邊同班擬忠武等號撫河衛海安  
沙輔義同班擬武臣等號航海寧沙撫朔平遠同班擬鎮兵等號  
龍幕威河和戎拓遠朔野朔海同班擬智威等號梯山寧寇綏邊  
安漠威隴五號同班擬智武等號威漢明義昭信綏河寧境同班  
擬輕車等號候律振朔宣節向義安隴同班擬寧遠等號振漠寧



隴陵海安遠平寇同班擬威雄等號懷德執信明節橫朔馳義同  
班擬武猛等號安朔寧河掃寇靜朔懷關同班擬驍雄等號度嶂  
奉化康義超隴揚化同班擬猛烈等號寧關橫沙雄邊振隴平河  
同班擬忠勇等號鑿空浮遼弘節宣義懷信同班擬明智等號明  
信陵河歸義欵塞扞海同班擬光烈等號立義仰化弘信守義奉  
忠同班擬颯勇等號奉誠立誠建誠顯誠義誠同班擬龍驤等號  
尉遼寧渤綏嶺威塞通候同班擬折衝等號掃荒威荒定荒開荒  
理荒同班擬開遠等號奉節歸節建節效節伏節同班擬超武等  
號渡河陵海承化奉正綏方同班擬伏波等號伏羲懷澤歸誠奉  
信懷義同班擬前鋒等號凡一百二十五將軍二十八班竝施外  
國戎號准于中夏焉大同四年魏彭城王爾朱仲遠來降以爲定  
洛大將軍仍使其北討故名云

陳承梁皆循其制官而又置相國位列丞相上并丞相太宰太傅  
太保大司馬大將軍竝以爲贈官定令尚書置五員郎二十一員  
其餘竝遵梁制爲十八班而官有清濁自十二班以上竝詔授表  
啓不稱姓從十一班至九班禮數復爲一等又流外有七班此是  
寒微士人爲之從此班者方得進登第一班其親王起家則爲侍  
中若加將軍方得有佐史無將軍則無府止有國官皇太子冢嫡  
者起家封王依諸王起家餘子竝封公起家中書郎諸王子并諸  
侯世子起家給事三公子起家員外散騎侍郎令僕子起家祕書  
郎若員滿亦爲板法曹雖高半階望終祕書郎下次令僕子起家  
著作佐郎亦爲板行參軍此外有揚州主簿太學博士王國侍郎  
奉朝請嗣王行參軍竝起家官未合發詔諸王公參佐等官仍爲  
清濁或有選司補用亦有府牒卽授者不拘年限去留隨意在府



之日唯賓遊宴賞時復修參更無餘事若隨府王在州其僚佐等  
或亦得預催督若其驅使便有職務其衣冠子弟多有修立非氣  
類者唯利是求暴物亂政皆此之類國之政事竝由中書省有中  
書舍人五人領主事十人書吏二百人書吏不足并取助書分掌  
二十一局事各當尚書諸曹竝為上司總國內機要而尚書唯聽  
受而已被委此官多擅威勢其庶姓為州若無將軍者謂之單車  
郡縣官之任代下有迎新送故之法餉饋皆百姓出竝以定令其  
所制品秩今列之云

相國丞相太宰太傅太保大司馬大將軍太尉司徒司空開府儀  
同三司已上秩萬石巴陵王汝陰王後尚書令已上秩萬石品竝第一中書監尚  
書左右僕射特進太子二傅左右光祿大夫已上中二千石品竝第二中書  
令侍中散騎常侍領護軍吏部尚書列曹尚書金紫光祿大夫光

祿大夫已上並中二千石左右衛將軍御史中丞已上二千石太后衛尉太僕少府

三卿太常宗正太府衛尉司農少府廷尉光祿太匠太僕鴻臚太  
舟等卿太子詹事國子祭酒已上中二千石揚州刺史凡單車刺史加督進一品都督進二品不論持節假節揚州徐

州加督進二品右光祿已下加都督第一品尚書令下南徐東揚州刺史皇弟皇子封國王世子品竝  
第三通直散騎常侍員外散騎常侍黃門侍郎已上二千石祕書監中二千石左

右驍騎左右游擊等將軍太子中庶子已上二千石太子左右衛率二千石朱  
衣直閣雲騎游騎將軍中書侍郎已上二千石尚書左右丞尚書吏部侍郎

郎中已上六百石尚書郎中與吏部郎同列今品同太子三卿太中中散大夫司徒左右長史已上二千石  
諸王師依秩減之例國子博士千石荆江南兗郢湘雍等州刺史六州加督進在第三品東揚州

下加都督進在第二品右光祿下嗣王蕃王郡公縣公等世子品竝第四祕書丞明堂  
太廟帝陵等令已上六百石散騎侍郎前左右後軍將軍左右中郎將已上二千石

大長秋二千石太子中舍人庶子六百石豫益廣衡等州青州領冀州北兗



北徐等州梁州領南秦州司南梁交越桂霍寧等十五州加督進在第四品雍州下加都督

州下加都督進在第三品南徐州下不言秩丹楊尹中二千石會稽太守二千石加督進在第四品雍州下加都督

皆以此差吳郡吳興二太守二千石侯世子不言秩皇弟皇子府諮議參軍八百石

皇弟皇子府板諮議參軍不言秩皇弟皇子府長史千石皇弟皇子府板司馬不言秩皇弟皇子公

長史不言秩皇弟皇子府司馬千石皇弟皇子府板司馬不言秩皇弟皇子公

府從事中郎六百石品並第五通直散騎侍郎千石者作郎六百石步兵射聲

長水越騎屯騎五校尉並千石太子洗馬六百石太子步兵翊軍屯騎三校

尉並秩同司徒左西掾屬並本秩四百石皇弟皇子公依減秩例皇弟皇子公府

屬本秩四百石五經博士六百石子男世子不言秩萬戶以上郡太守內史相

嗣王府皇弟皇子之庶子府諮議參軍六百石嗣王府皇弟皇子

之庶子府長史司馬並八百石庶姓公府諮議參軍六百石庶姓公府從事中

郎六百石皇弟皇子府中錄事參軍板府中錄事參軍中記室參軍板

中記室參軍中直兵參軍板中直兵參軍揚州別駕中從事皇弟

皇子南徐荆江南兗郢湘雍州別駕中從事並不言秩品並第六給事中

員外散騎侍郎祕書著作佐郎並四百石奉車駙馬都尉武賁中

郎將羽林監冗從僕射已上並六百石南臺治書侍御史六百石太

子舍人二百石太子門大夫六百石太子旅賁中郎將冗從僕射並秩同

司徒主簿依減秩例司徒祭酒不言秩領護軍長史司馬廷尉正監平並六百石皇

弟皇子府錄事記室中兵等參軍板錄事記室中兵等參軍功曹

史主簿公府祭酒並不言秩皇弟皇子文學依減秩例嗣王庶姓公府掾屬並本

太子二傅丞並六百石蕃王府諮議參軍四百石蕃王府板諮議參軍

蕃王府長史司馬並六百石庶姓持節府諮議參軍四百石庶姓非公

不持節將軍置長史六百石庶姓持節府板諮議參軍不言秩庶姓持節府

庶姓持節府

庶姓持節府

庶姓持節府



長史司馬並六百石板者皆不言秩嗣王府皇弟皇子之庶及庶姓公府中錄事

中記室中直兵參軍及板中錄事中記室中直兵參軍並不言秩不滿萬

戶太守內史相二千石丹楊會稽吳郡吳興及直隸郡丞並六百石建康令二千石

建康正監平秩同廷尉品並第七中書通事舍人秩同積射強弩武衛等將

軍公車令太子左右積弩將軍並六百石奉朝請武騎常侍秩例太后三

卿十二卿大長秋等丞並六百石左右衛司馬秩太子詹事丞胄子律

博士並六百石皇弟皇子府正參軍板正參軍行參軍板行參軍嗣王府

皇弟皇子之庶子府錄事記室中兵參軍板錄事記室中兵參軍

功曹史主簿庶姓非公不持節諸將軍置主簿庶姓公府錄事記

室中兵參軍板錄事記室中兵參軍主簿嗣王庶姓公府祭酒蕃

王府中錄事記室直兵參軍板中錄事記室直兵參軍庶姓持節

府中錄事記室直兵參軍及板中錄事記室直兵參軍太子太傅

五官功曹史主簿少傅五官功曹史主簿已上並不言秩太學博士六百石國子

助教司禮郎安蠻戎越校尉中郎將府等長史六百石蠻戎越等府佐無定

司馬六百石板者不言秩庶姓南徐荆江南兗郢湘雍等州別駕中從事不言秩不

滿萬戶已下郡丞六百石五千戶已上縣令相二千石皇弟皇子國郎中令

大農中尉並六百石品並第八左右二衛殿中將軍不言秩南臺侍御史依秩減例

東宮通事舍人不言秩材官將軍六百石太子左右二衛率殿中將軍及丞

嗣王府皇弟皇子之庶子府正參軍板正參軍行參軍板行參軍

庶姓公府正參軍板正參軍蕃王府錄事記室中兵等參軍板錄

事記室中兵等參軍功曹史主簿正參軍板正參軍行參軍板行

參軍庶姓持節府錄事記室中兵等參軍板錄事記室中兵等參

軍功曹史主簿庶姓豫益廣衡青冀北兗北徐梁秦司南徐等州



別駕中從事史揚州主簿西曹及祭酒議曹二從事南徐州主簿

西曹祭酒議曹二從事皇弟皇子諸州主簿西曹已上並不言秩不滿五千

戶已下縣令相六百石皇弟皇子國常侍侍郎不言秩嗣王國郎中令大農

中尉並四嗣王國常侍不言秩藩王國郎中令大農殿中並二品並第九又

有戎號擬官自一品至於九品凡二百三十七鎮衛驃騎車騎等

三號將軍擬官品第一比秩中二千石四中軍中二千石四征東南西北八鎮東南西北等十六

號將軍擬官品第二秩中二千石八安左前右後四羽左前右後四平東南西北等十六號

將軍擬官品第三秩中二千石忠武軍師武臣爪牙龍騎雲麾冠軍鎮兵

翊師宣惠宣毅等將軍四中郎將智仁勇信嚴等五威五武將軍

合二十五號擬官品第四秩中二千石輕車鎮朔武旅貞毅明威等將軍

將軍加大者三階寧安征振宣等五遠將軍寧蠻校尉雍州小府蠻越校尉中

凡亦大通進一階若軍作則減刺史一階合十八號擬官品第五威雄猛烈震信略勝風力

光等十威武猛略勝力毅健烈威銳勇等十武猛毅烈威震銳進

智勝駿等十猛壯武勇烈猛銳威力毅志意等十壯驍雄桀猛烈

武勇銳名勝迅等十驍雄猛威明烈信武勇毅壯健等十雄忠勇

烈猛銳壯毅捍信義勝等十忠明智略遠勇烈威銳毅勝進等十

明光烈明英遠勝銳命勇戎野等十光颯勇烈猛銳奇決起勝略

出等十颯將軍平越中郎廣梁南秦南梁西戎平戎鎮蠻三校尉等擬

官一百四號品第六並下龍驤武視雲旗風烈電威雷音馳銳追銳

羽騎突騎折衝冠武和戎安壘超猛英果掃虜掃狄武銳椎鋒開

遠略遠貞威決勝清野堅銳輕車拔山雲勇振旅等將軍擬官三

十號品第七並六超武鐵騎樓船宣猛樹功克狄平虜稜威戎昭威


戎伏波雄戟長劍衝冠雕騎伏飛勇騎破敵克敵威虜等將軍鎮

蠻護軍西陽南新蔡香熙盧江郡小府鎮蠻安遠安遠護軍度支

府主號輕重若軍作則減太守內史相一階若有將軍減一階

安遠護軍度支





校尉巴陵郡丞等擬官二十三號品第八並六前鋒武毅開邊招遠金威破  
 陣蕩寇殄虜橫野馳射等將軍擬官十號品第九並四諸將起自第  
 六品已下板則無秩其雖除不領兵領兵不滿百人并除此官而  
 為州郡縣者皆依本條減秩石二千石為千石石降為六百石自四百石降為三百石無秩其州郡縣自各以本秩論凡板將  
 軍皆降除一品諸依此減降品秩其應假給章印各依舊差不貶  
 奪其封爵亦為九等之差郡王第一口秩萬石嗣王蕃王開國郡縣公  
 第二品開國郡縣侯第三品開國縣伯第四品並視中二千石開國子第五  
 品開國男第六品並視二千石湯沐食侯第七品鄉亭侯第八品並視千石關  
 中關外侯第九品百石  
 陳依梁制年未滿三十者不得入仕唯經學生策試得第諸州光  
 迎至簿西曹左奏及經為挽郎得仕其諸郡唯正王任丹楊尹經  
 迎得出身庶姓尹則不得必有奇才一異行殊勳別降恩旨敘用者

不在常例其相知表啓通舉者每常有之亦無年常考校黜陟之  
 法既不為此式所以勤惰無辨凡選官無定期隨闕即補多更互  
 遷官未必即進班秩其官唯論清濁從濁官則微清則勝于轉若  
 有遷授或由別敕但移轉一人為官則諸官多須改動其用官式  
 吏部先為白牒錄數十人名吏部尚書與參掌人共署奏敕或可  
 或不可其不用者更銓量奏請若敕可則付選更色別量貴賤內  
 外分之隨才補用以黃紙錄名八座通署奏可即出付典名而典  
 以名帖鶴頭板整威儀送往得官之家其有特發詔授官者即宣  
 付詔誥局作詔章草奏聞敕可黃紙寫出門下門下答詔請付外  
 施行又畫可付選司行召得詔官者不必皆須待召但聞詔出明  
 日即與其親入謝後詣尚書上省拜受若拜王公則臨軒



